

SAMOA

Faatulagaina o Aiaiga

1. Igoa puupuu ma le amataga
 2. Ua teuteuina le Igoa o le Tulafono autu
 3. Ua teuteuina le Igoa umi o le Tulafono autu
 4. Ua faaofiina le Ulutala fou o le Vaega 1
 5. Ua teuteuina le fuaiupu 1
 6. Ua teuteuina le fuaiupu 2
 7. Ua faaofiina aiaiga fou
 8. Ua faaofiina le Ulutala fou o le Vaega 3
 9. Ua faaofiina le Ulutala fou o le Vaega 4
 10. Ua faaofiina le Ulutala fou o le Vaega 5
 11. Ua faaofiina le fuaiupu 9 fou
 12. Aiaiga tau soloaiga
 13. Ua teuteuina le Faamatalaga
-

2 *Teuteuga o le Tulafono o le Aoga Tau Faatoaga a le Iunivesite o le Pasefika i Saute* 2019, Nu. 26

2019, Nu. 26

O SE TULAFONO e:

- (a) teuteuina ai le Tulafono o le Aoga Tau Faatoaga a le Iunivesite o le Pasefika i Saute 1977 (“Tulafono autu”);
- (b) faavaeina ai le Iunivesite o le Pasefika i Saute e avea o se faalapotopotoga faaletulafono; ma
- (c) aloaia ai le Feagaiga o le Iunivesite o le Pasefika i Saute ina ia amanaia ai le Iunivesite o le Pasefika i Saute i totonu o Samoa ma isi Atunuu o Avea ma Sui Auai o le Iunivesite. [01 Iulai 2019]

UA FAIA e le Fono Aoao Faitulafono a Samoa i totonu o le Palemene ua potopoto e faapea:

1. Igoa puupuu ma le amataga:

E mafai ona taua leni Tulafono o le Tulafono o Teuteuga o le Tulafono o le Aoga Tau Faatoaga a le Iunivesite o le Pasefika i Saute 2019 ma e amata faamamaluina i le aso e tuuina i ai le maliega a le O Le Ao o le Malo.

2. Ua teuteuina le Igoa o le Tulafono autu:

I totonu o le igoa o le Tulafono autu, ia aveese upu “Aoga Tau Faatoaga”.

3. Ua teuteuina le Igoa umi o le Tulafono autu:

Mo le Igoa umi o le Tulafono autu, ia suia e faapea:

“O se Tulafono e:

- (a) aloaia ai le Feagaiga o le Iunivesite o le Pasefika i Saute;
- (b) faavaeina ai le Iunivesite o le Pasefika i Saute e avea ma faalapotopotoga ua tuufaatasia faaletulafono;
- (c) faavaeina ai le Aoga Tau Faatoaga a le Iunivesite o le Pasefika i Saute i Alafua, Samoa;
- (d) faatagaina ai le faavaeina o isi aoga, faalapotopotoga po o itutino o le Iunivesite o le Pasefika i Saute;
- (e) faatagaina ai le faamatuuina atu o lisi ma le faaliliuina atu o isi aseta i le Iunivesite o le Pasefika i Saute; ma
- (f) mo isi faamoemoega e fesootai i ai.”.

4 Ua faaofiina le Ulutala fou o le Vaega 1:

A o lumanai ai le fuaiupu 1 o le Tulafono Autu, ia faaofi le “**VAEGA 1 - FAATOMUAGA**” e avea ma ulutala fou o le Vaega.

5 Ua teuteuina le fuaiupu 1:

I totonu o le fuaiupu 1(1) o le Tulafono autu, ia aveese upu “Aoga Tau Faatoaga”.

6. Ua teuteuina le fuaiupu 2:

Ua teuteuina le fuaiupu 2 o le Tulafono autu e faapea:

- (a) i le faamatalaina o le uiga o le upu "Aoga", mo le "fuaiupu 3" ia suia i le "fuaiupu 4";
- (b) mo le faamatalaina o le uiga o le upu "Iunivesite", ia suia e faapea:

""Iunivesite" o lona uiga o le Iunivesite o le Pasefika i Saute ua faavaeina i lalo o le fuaiupu 3 ma le Feagaiga Tusinga o le Iunivesite o le Pasefika i Saute.";

- (c) ia faaofi i le faasologa o le pi faitau faa-Peretania o faamatalaga fou nei:

""Minisita" o lona uiga o le Minisita e fitoitonu i ai Aoga;

"Atunuu o Avea ma Sui Auai" e i ai lona uiga tutusa i lalo o le Mataupu 2 o le Feagaiga o le Iunivesite o le Pasefika i Saute e pei ona faatulaga atu i totonu o le Faamatalaga 2;

"Feagaiga Tusinga o le Iunivesite o le Pasefika i Saute" po o le "Feagaiga Tusinga o le USP" o lona uiga o le Feagaiga Tusinga o le Iunivesite lea ua faatulaga atu i totonu o le Faamatalaga 3, ma e aofia ai so o se teuteuga ua faia i le Feagaiga Tusinga o le USP;

"Feagaiga o le Iunivesite o le Pasefika i Saute" po o le "Feagaiga o le USP" o lona uiga o le Feagaiga ua faapea ona amanaia ai le

Iunivesite o le Pasefika i Saute i Atunuu o Avea ma Sui Auai o le Iunivesite na sainia ma faamaonia e Samoa i le aso 25 o Me 2017 i Majuro, i totonu o le Malo o Tagatanuu o le Atu Malesala e pei ona faatulaga atu i le Faamatalaga 2;

“o Tulafono o le Iunivesite o le Pasefika i Saute” po o “Tulafono o le USP” o lona uiga o Tulafono o le Iunivesite ua faatulaga atu i le Faamatalaga 4, ma e aofia ai so o se teuteuga ua faia i ai;” ma

- (d) ia toe faafuainumera aiaiga o i ai nei i totonu o le fuaiupu 2 e avea ma faafuaiupu (1) ma faaofi e faapea:

“(2) I le faamatalaina o le uiga o le Feagaiga o le USP, e ao ona amanaia ai tulaga nei:

- (a) o le Feagaiga Tusitusia o le USP e pei ona faatulaga atu i le Faamatalaga 3; ma
- (b) Tulafono o le USP e pei ona faatulaga atu i totonu o le Faamatalaga 4.”.

7. Ua faaofiina aiaiga fou:

I le tuanai ai o le fuaiupu 2 o le Tulafono autu ia faaofi e faapea:

“2A. Faaaogāina o le Feagaiga o le USP:

- (1) O le Feagaiga o le USP i lona tulaga lautele, e faasino i le amanaia ma le faagaoioiga o le Iunivesite i totonu o Samoa, e tatau ona i ai le malosiaga o le tulafono i totonu o Samoa.
- (2) E mafai e le Minisita i le maea ai ona faia o so o se teuteuga i le Feagaiga o le USP, ona ia tuuina atu se ata o le teuteuga ina ia lomua faasalalau i totonu o le Savali po o so o se isi lava nusipepa i totonu o Samoa.

VAEGA 2

FAAVAEINA O LE IUNIVESITE

2B. Faavaeina o le Iunivesite:

Ua faavaeina le Iunivesite e avea ma faalapotopotoga ua tuufaatasia faaletulafono faatasi ai ma soloaiga lē motusia ma se faamaufaailoga, ma e agavaa e:

- (a) sainia konekarate, mauaina, umia ma faamatuu atu meatotino tumau ma meatotino tau i le tagata lava ia; ma
- (b) faia moliaga ma e molia foi; ma
- (c) faia isi mea uma ia e mafai e se faalapotopotoga ua tuufaatasia faaletulafono ona faia e tusa ma le tulafono i lalo o tulafono a Samoa.

2C. Faiga e laugatasia uma ai tagatanuu o le atunuu:

- (1) E tatau ona agavaa le Iunivesite i faiga e laugatasia uma ai tagatanuu o le atunuu i lalo o tulafono a Samoa.
- (2) Mo le faamoemoe o lenei fuaiupu:
“faiga e laugatasia uma ai tagatanuu o le atunuu” o lona uiga e faapea, i le faagaoioiga o le Iunivesite i totonu o Samoa, e ao ona agavaa le Iunivesite i aia tatau tutusa ma faamanuiaga uma ia e agavaa i ai tagatanuu o Samoa i totonu o Samoa; ma
“tagatanuu” e aofia ai tagata soifua ma faalapotopotoga faaletulafono ia ua faatatauina i lalo o tulafono a Samoa, o tagatanuu o Samoa.”.

8. Ua faaofiina le Ulutala fou o le Vaega 3:

A o lumanai ai le fuaiupu 3 o le Tulafono autu, ia faaofi le “**VAEGA 3 - FAAVAEINA O AOGA O LE IUNIVESITE**” e avea ma ulutala fou o lea Vaega.

9. Ua faaofiina le Ulutala fou o le Vaega 4:

I le tuanai ai o le fuaiupu 5 o le Tulafono autu, ia faaofi le “**VAEGA 4 - LISI MA ASETA**” e avea ma ulutala fou o lea Vaega.

10. Ua faaofiina le Ulutala fou o le Vaega 5:

I le tuanai ai o le fuaiupu 7 o le Tulafono autu ia faaofi le “VAEGA 5 - AIAIGA ESEESE” e avea ma Ulutala fou o lea Vaega.

11. Ua faaofiina le fuaiupu 9 fou:

I le tuanai ai o le fuaiupu 8 o le Tulafono autu, ia faaofi e faapea:

“9. Tulafono Faatonutonu:

E tatau i le O Le Ao o le Malo ona faia Tulafono Faatonutonu e talafeagai po o e aogā mo le faataunuaina o faamoemoega o lenei Tulafono.”.

12. Aiaiga tau soloaiga:

I le amata faamamaluina ai o lenei Tulafono, o se faasinomaga i so o se tulafono po o tusitusiga o faamaumauga i le Tulafono autu e ao ona faitauina e faapea, o le Tulafono o le Iunivesite o le Pasefika i Saute 1977, ae vagana ai ua manaomia e le mataupu se isi uiga e ese ai.

13. Ua teuteuina le Faamatalaga:

I totonu o le Tulafono autu, ua teuteuina le Faamatalaga e faapea:

- (a) mo le upu “Faamatalaga” ia suia i le “Faamatalaga 1”; ma
- (b) faaofi Faamatalaga fou nei:

“FAAMATALAGA 2
FEAGAIGA O LE USP I LE AMANAIA AI O LE
IUNIVESITE O LE PASEFIKA I SAUTE I ATUNUU
TAITASI O AVEA MA SUI AUAI O LE IUNIVESITE
(Fuaiupu 2)

O Faiga Malo a le Atu Kuki, Malo o Tagatanuu o Fiti, Malo o Tagatanuu o Kiripati, Malo o Tagatanuu o Malesala, Malo o Tagatanuu o Nauru, Niue, o le Malo Tutoatasi o Samoa, Atu Solomona, Tokelau, Malo o Toga, Tuvalu, Malo o Tagatanuu o Vanuatu.

I LE AMANAIA AI o le faavaeina i le 1968 o se Iunivesite mo le Pasefika i Saute, ua avea ma Iunivesite o le Pasefika i Saute (“USP”), faapea ma le faamatuuina atu o se Feagaiga Tusitusia mai Lana Maiesetete le Tupu Tamaitai o Elisapeta II i le 1970, ma o le a faapea ona faailogaina e le Iunivesite o le Pasefika i Saute i le 2018 lona 50 tausaga talu ona faavaeina.

UA FAAALIA AI le sao taua ua faia talu ona uluai faavaeina e le Iunivesite o le Pasefika i Saute i totonu o le itulagi o le Pasefika, ma aloaia ai le tulaga faapitoa ua i ai le USP i le uunaia o le faaooina atu o tulaga tau aoaoga ma le atamai i totonu o se siosiomaga e uluola faaleaganuu ma faaaloaloga ai le eseese o tu ma aganuu a Atunuu uma o Avea ma Sui Auai.

I LE TALITONUGA e faapea o le a manuia ai atunuu uma o le itulagi o le Pasefika, tulaga mamalu faaleaganuu ma atinae tau tamaoaiga i le itulagi e ala i le USP i le tuuina atu o aoaoga, sailiiliga faapitoa, faasoa atu o le tomai, faalauiloaina o tu ma agaifanua ma le faaaloalo aemaise le faafaigaluegaina o ona tagata ua faauuina ma faailoga i totonu lava o le Iunivesite ma mo le itulagi.

I LE MANAOGA ina ia faaauau pea ona amanaia saofaga uma ua faia e le USP ma ona tagata ua faauuina ma faailoga i totonu lava o le Iunivesite ma mo le manuia o Atunuu o Avea ma Sui Auai ma le Pasefika i lona aotelega.

I LE FAAMOEMOE ina ia faamausali galuega faaauau a le USP mo avanoa faaleaoaoga ma galuega mo ona tagata aoga faatasi ma faamanuiaga tau le tamaoaiga ma tulaga faaleaganuu o Atunuu o Avea ma ona Sui Auai ma so o se isi lava atunuu o le Pasefika ua manao e aveia ma sui auai o le Iunivesite o le Pasefika i Saute.

I LE UUNAIA MA LE LAGOLAGOINA o le galulue soosootauau faaitulagi ma le tuufaatasia o taunuuga tau le aoaoga, faaleleia ma tatala avanoa faigaluega ma faamalosi sootaga faaleaganuu i le va o Atunuu o Avea ma Sui Auai, ma i totonu o le Pasefika i lona aotelega.

I LE FAAMOEMOE o le galulue faapaaga o le tasi i le isi o Atunuu o Avea ma Sui Auai faatasi ai ma isi e le o aofia ai i le li’o faaitulagi o le Pasefika ina ia ausia sini fefaasoaai o le faatupulaia o le tamaoaiga ma atinae gafataulimaina i totonu o le taiala faataatia faaleaganuu a atunuu taitasi, ma ia galulue faatasi ina ia maua avanoa faigaluega, pulega lelei ma le saogalemu i totonu o le Pasefika.

I LE FAAMAUSALIINA o le tulaga tutusa o Atunuu uma o Avea ma ona Sui Auai.

UA MALILIE AI E FAAPEA:

Mataupu I
Aotelega o le Faaaogāina

O le Feagaiga lena e tataua ona faaaogā i le va feagai ai o le Iunivesite o le Pasefika i Saute ma Atunuu o Avea ma Sui Auai ma tagata po o faalapotopotoga faaletulafono ia o lo o i lalo o a latou puleaga po o pulega taitasi.

Mataupu II
O le Iunivesite o le Pasefika i Saute

1. Ua amanaia le Iunivesite o le Pasefika i Saute e ala i lona tuuina atu o avanoa tau aoaoga i aoga i tua atu o aoga maualuluga ma aoaoga tau iunivesite talu mai le 1968, i tagata o le Pasefika ma isi atunuu e ese ai.

12 *Teuteuga o le Tulafono o le Aoga* 2019, Nu. 26
Tau Faatoaga a le Iunivesite o le Pasefika i Saute

2. Ua aofia ai i Atunuu ua Avea ma Sui Auai o le USP, le Atu Kuki, Malo o Tagatanuu o Fiti, Malo o Tagatanuu o Kiripati, Malo o Tagatanuu o le Atu Malesala, Malo o Tagatanuu o Nauru, Niue, Malo Tutoatasi o Samoa, o le Atu Solomona, Tokelau, Malo o Toga, Tuvalu, Malo o Tagatanuu o Vanuatu ma isi lava atunuu ia e ono mafai ona talia e avea ma sui auai i le lumanai faatasi ai ma le faamaoniga a le Fono a le Iunivesite o le Pasefika i Saute.

Mataupu III
Faamoemoe

Ia faafou e Atunuu o Avea ma Sui Auai a latou maliega i, ma faaauau pea ona avea ma sui auai o le Iunivesite o le Pasefika i Saute ma ia faia aiaiga mo galuega faaauau pea ma atiae atili le Iunivesite o le Pasefika i Saute i totonu o Atunuu taitasi o Avea ma Sui Auai.

Mataupu IV
O le Fono a le Iunivesite o le Pasefika i Saute

1. O le Fono a le Iunivesite o le Pasefika i Saute e faagaioioia e tusa ai ma le Feagaiga Tusitusia a Lana Maiesetete le Tupu Tamaitai ma tulafono a le Iunivesite ia ua faapipii atu i le Faamatalaga o lenei Feagaiga ma e leai se mea o i totonu o lenei Feagaiga o le a suia ai le faaogāina o le Feagaiga Tusitusia a Lana Maiesetete le

Tupu Tamaitai po o Tulafono a le Iunivesite, po o e taofia ai po o le aafia ai o latou teuteuga e pei ona aiaia ai i totonu o ia pepa faaletulafono.

2. Ua amanaia i le Feagaiga Tusitusia a Lana Maiesetete le Tupu Tamaitai o Atunuu o Avea ma Sui Auai na faavaeina faapea ma sui auai fou ua taliaina i totonu o le Iunivesite o le Pasefika i Saute ina ia tusa ai ma tuutuuga o le Feagaiga Tusitusia a Lana Maiesetete le Tupu Tamaitai po o, ina ia tusa ai ma isi faatulagaga ua faamaonia e le Fono.
3. E agavaa Ausetalia ma Niu Sila e auai i le Iunivesite o le Pasefika i Saute e ala i le avea ai ma sui auai o le Fono.
4. E agavaa le Ofisa Tutotonu o le Fono a Atunuu o le Pasefika e auai i le Iunivesite o le Pasefika i Saute e ala i le avea ai o i latou ma sui auai o le Fono.
5. E agavaa tagata ua faauuina ma faailoga, o le aufaigaluega ma tagata aoga e auai i le pulega o le Iunivesite o le Pasefika i Saute e ala i le avea ai o i latou ma sui auai o le Fono.
6. E mafai e le Fono a le Iunivesite o le Pasefika i Saute, pe afai ua manatu o ia ua talafeagai ai ona valaauina isi tagata ina ia auai i le Fono e pei ona aiaia i totonu o Tulafono a le Iunivesite.

14 *Teuteuga o le Tulafono o le Aoga* 2019, Nu. 26
Tau Faatoaga a le Iunivesite o le Pasefika i Saute

7. E usua fonotaga a le Fono a le Iunivesite o le Pasefika i Saute i totonu o Atunuu o Avea ma Sui Auai ma isi lava nofoaga e pei ona manatu le Fono ua talafeagai ai.

Mataupu V

Tulaga Faaletulafono ma le Va Feagai ai ma le Atunuu

1. O le a tatau ona agavaa le Iunivesite o le Pasefika i Saute i le tulaga mafai gafatia faaletulafono o se faalapotopotoga ua tuufaatasia faaletulafono i totonu o puleaga faa-faamasinoga a Atunuu o Avea ma ona Sui Auai ma o le a tatau foi ona agavaa i faiga tutusa e laugatasia uma ai tagatanuu i totonu o puleaga faa-faamasinoga taitasi nei.
2. O faiga tutusa e laugatasia uma ai tagatanuu o lona uiga e faasino i le faagaoioiga o le Iunivesite o le Pasefika i Saute i totonu o Atunuu taitasi o Avea ma Sui, e tatau i lea Atunuu ona faamatuu atu aia tatau lava ia i le Iunivesite o le Pasefika i Saute e faapei ona ia faamatuu atu i ona lava tagatanuu. "Tagatanuu" o lona uiga o faalapotopotoga faaletulafono ua tuufaatasia i lalo o tulafono a le Atunuu o Avea ma Sui Auai.

E faaogā tulafono faafoe o faiga tutusa e laugatasia uma ai tagatanuu i tulaga uma e manuia ai, ia e faamatuu atu i lalo o tulafono a se Atunuu o Avea ma Sui Auai, i ona tagatanuu.

Mataupu VI

Gafataulimaina o le Tulaga Tau Tupe

1. Ua talia aloaia e Atunuu o Avea ma Sui Auai le tulaga e faapea o le manuia o le USP e faalagolago i luga o le lagolago tau tupe e mafai ona fuafuaina ma faatuatuaina mai atunuu nei o avea ma Sui Auai, e ave ma atunuu e ona le USP.
2. O faiga faapaaga i le va o Malo o Atunuu o Avea ma Sui Auai, paaga tau atinae, lagolago a tagata aoga e ala i tupe totogi o totogifuapauina o tusi aoga ma isi totogifuapauina ma isi punaoa o tupe maua ua faapea ona mauaina ai o le tulaga tau tupe e mafai ona faatino mo le USP.

Mataupu VII

Fofō o feeseeseaiga

1. I le tulaga pe afai e tulai mai ni feeseeseaiga i le va o Atunuu o Avea ma Sui Auai ona o galuega a le Iunivesite o le Pasefika i Saute po o i le va o se Atunuu o Avea ma Sui Auai e tasi (1) po o le sili atu foi ma le Iunivesite o le Pasefika i Saute e uiga i le faauigaina po o le faaaogāina o lenei Feagaiga, ia malilie vaega auai i le feeseeseaiga ina ia foia le feeseeseaiga i se faiga e aupito sili ona malupuipuia ai le faagaoioiga ma faamoemoega ua faatulaga atu i totonu o le Feagaiga Tusitusia a Lana Maiesetete le Tupu Tamaitai, o Tulafono a le Iunivesite ma lalo o lenei Feagaiga.

16 *Teuteuga o le Tulafono o le Aoga* 2019, Nu. 26
Tau Faatoaga a le Iunivesite o le Pasefika i Saute

2. E tatau i vaega auai ona feutagai ma le faamoemoe e foia le feeseeseaiga e ala i faatalanoaga po o isi lava auala e foia ai lea feeseeseaiga, e tau fai malilie uma i ai vaega auai.

Mataupu VIII

**Sainiga, Faamaoniga Aloaia, Auai i
Feagaiga, Faamamaluina ma le Teena**

1. O lenei Feagaiga e tatau ona avanoa mo le sainia e Malo o le Atu Kuki, Malo o Tagatanuu o Fiti, Malo o Tagatanuu o Kiripati, Malo o Tagatanuu o le Atu Malesala, Malo o Tagatanuu o Nauru, Niue, Malo Tutoatasi o Samoa, Atumotu o Solomona, Tokelau, Malo o Toga, Tuvalu, Malo o Tagatanuu o Vanuatu seia aulia le taimi e faamamaluina ai po o, mo le 24 masina po o fea lava o ia vaitaimi e umi.
2. O lenei Feagaiga e noatia ma fai fuafua i faamaoniga aloaia, ma e faamamaluina i le tolusefulu aso i le maea ai ona teuina e Atunuu e ono (6) o Avea ma Sui Auai, a latou pepa faaletulafono o le faamaoniga aloaia i le nofoaga o teumalu ai.
3. E tusa ai ma le tuuina atu mulimuli ane e so o se Atunuu o Avea ma Sui Auai o lana pepa faaletulafono o le faamaoniga aloaia i le nofoaga e teumalu ai, e tatau ona faamamaluina le Feagaiga mo lea Atunuu o Avea

ma Sui Auai i le tolusefulu aso a ua tuanai ai ona taulimaina e le nofoaga o teumalu ai pepa faaletulafono o faamaoniga aloaia a lea Atunuu o Avea ma Sui Auai.

4. E lē tatau ona faatatauina e faapea o le saini a se Atunuu o Avea ma Sui Auai o le a avea lea ma mafuaaga o le a faaopoopoina ai aia tatau ma noataga ua faatulagaina atu i totonu o lenei Feagaiga i so o se teritori ia e fesootai i ai, peitai e le o aofia ai i le puleaga faa-faamasinoga a le Atunuu o Avea ma Sui Auai.
5. E tatau i le nofoaga o teumalu ai pepa faaletulafono ona logoina Atunuu o Avea ma Sui Auai e uiga i le faamamaluina o lenei Feagaiga ina ia tusa ai ma lenei Mataupu.
6. O se Atunuu o Avea ma Sui Auai e le i sainia le Feagaiga i totonu o le vaitaimi ua faasinomia i le parakalafa 1 o lenei Mataupu, e mafai ona auai i lenei Feagaiga e ala i le teuina o se pepa faaletulafono o le auai i le feagaiga i le nofoaga o teumalu ai ma, o le a tatau ona faamamaluina le Feagaiga mo lea Atunuu o Avea ma Sui Auai i le tolusefulu aso i le tuanai ai o le aso na taulimaina ai e le nofoaga o teumalu ai pepa faaletulafono o le auai i le feagaiga a lea Atunuu o Avea ma Sui Auai.
7. E mafai e isi Malo faaleatunuu i le i ai faatasi ma le faamaoniga a le Fono a le Iunivesite o le Pasefika i Saute ona auai i lenei Feagaiga. O le auai ai i lenei Feagaiga ua

avea ai se Malo o se atunuu ma Atunuu o Avea ma Sui Auai o le Iunivesite o le Pasefika i Saute. Mo se Malo ua taliaina le avea ai ma Sui Auai i le USP ina ia tusa ai ma lenei parakalafa, e tatau ona faamamaluina le Feagaiga i le aso na taulimaina ai e le nofoaga o teumalu ai pepa faaletulafono a lea atunuu o ana pepa faaletulafono, o le auai i le feagaiga, po o le aso na faamamaluina ai le Feagaiga i lona tulaga lautele ina ia tusa ai ma le parakalafa 2 o lenei Mataupu, po o fea lava o ia mea e tulai mulimuli mai.

8. E mafai e so o se Atunuu o Avea ma Sui Auai ona teena lenei Feagaiga e ala i se faasilasilaga e faatuatusi atu i le nofoaga o teumalu ai pepa faaletulafono ma tuuina atu se ata i le Failautusi o le Fono a le Iunivesite o le Pasefika i Saute. O sea faasilasilaga e mafai ona tuuina atu faatasi ma se faamatalaga tusitusia o mafuaaga o le teena ai, lea e tatau ona tuuina atu e le nofoaga o teumalu ai, i isi Atunuu uma o Avea ma Sui Auai. O le a aloaia lea tetee i le tasi (1) le tausaga i le tuanai ai o le aso na taulimaina ai e le nofoaga o teumalu ai pepa faaletulafono le faasilasilaga, seia vagana ai ua toe vave faau i tua le faasilasilaga.

Mataupu IX

Atunuu e Teumalu ai Pepa Faaletulafono

1. O le a tatau ona tuuina atu ma teumalu le uluai ata o lenei Feagaiga i le Malo o Tagatanuu o Fiti, lea o le a tatau ona avea ma atunuu e teumaluina ai lenei Feagaiga.

2. E tatau i le atunuu o teumaluina ai le feagaiga ona tuuina atu ata faamaonia i Atunuu uma ua Avea ma Sui Auai faapea ma le Iunivesite o le Pasefika i Saute.

Mataupu X

Teuteuga

1. E mafai e se Atunuu o Avea ma Sui Auai ona talosagaina le faia o teuteuga i lenei Feagaiga. O teuteuga e talosagaina o le a tatau ona tuuina atu i le atunuu o teumaluina ai le feagaiga lea o le a ia faasalalauina atu loa i Atunuu uma o Avea ma Sui Auai faapea ma le Iunivesite o le Pasefika i Saute.
2. Afai e talosagaina e se vaega toatele o Atunuu o Avea ma Sui Auai le atunuu o teumaluina ai pepa faaletulafono ina ia taloina se fonotaga e iloiloaina ai teuteuga ua talosagaina, o le a tatau i le atunuu o teumaluina ai, i se taimi vave lava e mafai ai ona faatino, e ala i le Iunivesite o le Pasefika i Saute, ona valaauina Atunuu uma o Avea ma Sui Auai ina ia auai ai i sea fonotaga ina ia vave amata i le maea ai o le tolusefulu aso talu ona tuuina atu ai tusi valaau. O so o se teuteuga ua faamaonia i le fonotaga e se vaega toatele o le lua-vae-tolu o Atunuu o Avea ma Sui Auai, o le a tatau ona tusia aloaia i tuutuuga tau maliiega lea ua avanoa mo le sainia e Atunuu uma o Avea ma Sui Auai.

3. E tatau ona faamamaluina tuutuuga tau maliega i le tolusefulu aso i le maea ai ona tuuina atu e le vaega toatele o Atunuu o Avea ma Sui Auai a latou pepa faaletulafono o le faamaoniga o tuutuuga tau maliega i le atunuu o teumalu ai pepa o le feagaiga. Mo atunuu taitasi o Avea ma Sui Auai o teuina ana pepa faaletulafono o le faamaoniga o tuutuuga tau maliega i le tuanai ai o lona faamamaluina, o le a tatau loa ona faamamaluina aloaia tuutuuga tau maliega mo lea Atunuu o Avea ma Sui Auai i le tolusefulu aso ina ua maea ona taulimaina e le atunuu o teumaluina ai le pepa faaletulafono o le faamaoniga a lea Atunuu o Avea ma Sui Auai.

UA AVANOA MO LE SAINIA i Majuro i le Malo o Tagatanuu o le Atu Malesala i lenei aso 25 o Me o le tausaga e 2017.

FAAMATALAGA 3
(Fuaiupu 2)

O LE FEAGAIGA TUSITUSIA O LE IUNIVESITE

**UA FAIA I LE FAAMASINOGA I LE MAOTA O LE
TUPU TAMAITAI I BUCKINGHAM I LE ASO 4 O
FEPUARI 1970 MA UA FAAPEA ONA TAUAO
ALOIA ATU E**

LANA MAISETETE LE TUPU TAMAITAI I LE FONO

ONA o le aso lenei ua faitauina ai i luma o le Komiti Faatino le Ata Tusia o se Feagaiga Tusitusia mo le faavaeina o se Faalapotopotoga ua Tuufaatasia Faaletulafono i lalo o le igoa ma le faiga e faapea “O le Iunivesite o le Pasefika i Saute”.

O LANA MAISETETE, i le maea ai o lana iloiloga i le Ata Tusia ua taua, ma ua faamalieina ai lana afioga, faatasi ai ma le fautuaga mai le Fono a Ana Faufautua ina ia faamaonia loa, ma poloaiina, e pei ona tuuina atu ai nei le poloaiga e faapea, o Lana Afioga Mamalu ia Michael Stewart, o se tasi o ana Failautusi Autu o le Malo o Peretania, ina ia saunia se Tusi Faapoloaiga mo le sainia aloaia e Lana Maiesetete le Tupu Tamaitai, mo le pasia i lalo o le Faamaufaaailoga Tele o se Feagaiga Tusitusia ina ia ogatasi ma le Ata Tusia ua taua, lenei ua faapea ona faapipii atu iinei.

W. G. AGNEW

O ELISAPETA LE LUA, e ala i le Alofa Tunoa O Le Atua o Malo Soofaatasi o Peretania Tele ma Aialani i Matu, faapea ai ma isi Malo ma Teritori o i lalo o le Puleaga a le Tupu Tamaitai, o le Faauluuluga o Malo o le Taupulega, ma lē o lo o Puipuia le Faatuatuaga:

MO I LATOU UMA UA AFIFIO MAI MA TALA MAI AAO, E FAATALOFA ATU!

ONA ua i ai i le tatou Failautusi Autu o le Malo mo Mataupu tau i le Va i Fafu ma Malo o le Taupulega, i le avea ai ma sui o le Fono Lē Tumau a le Iunivesite o le Pasefika i Saute ma, ina ia tusa ai ma manaoga o Malo o le Atumotu o Solomona o i lalo o le puleaga a Peretania, Fiti ma Atumotu o Kiripati ma Elise ma i le maea ai ona feutagai ma le matou Hai Komesina mo le Pasefika i Sisifo i le amanaia ai o aia tatau a tagata o Niu Heperiti, ua avea ai i latou ma sui e faaoo mai ia i Matou e faapea, e taua tele le faavaeina ma Tatou fausia se Iunivesite o le Pasefika i Saute mo le tausiga, faalauteleina ma le faasoaina atu o le atamai e ala i le aoaoina, galuega faufautua faapitoa ma sailiiliga faapitoa ma i se isi foi faiga e ese ai mo le tuuina atu i laasaga eseese talafeagai o aoaoga ma aoaoga faamasani e tali atu i le soifua manuia ma manaoga o atunuu o le Pasefika i Saute, ma ua tatau ai ona faamatuu atu se Feagaiga Tusinga faatasi ai ma tuutuuga i ia tulaga ua taua, e tatau ona sa’o atoatoa ma talafeagai ia i tatou.

MA ONA UA FAAPEA ona faaalua e le Malo o le Atu Kuki, Malo o Tagatanuu o Nauru, Niue, Atumotu o Tokelau, le Malo o Toga, ma le Malo Tutoatasi o Samoa i Sisifo, le finagalo e faapea, ua alagataua ona faavaeina sea ituaiga Iunivesite.

O LE MEA LEA E AO AI ONA SILAFIA o i Matou nei e tusa ai ma lo Matou Tulaga Aloaia Faaleaganuu i le amanaia ai o Fiti faapea ma la Matou Faaaloaloga Faapitoa i Lana Afioga, o nisi o tomai ma nai manatu ua

matou faamautuina ma ua faamamaluina e i Latou o Auai nei, O o matou Suli moni ma i Latou o le a Soloai Ane i ai o le a usitaia ma talia e faapea:

1. O le a tatau ona i ai ma ua tuufaatasia faaletulafono ma faavaeina nei mo atunuu o le Pasefika i Saute se Iunivesite ua i ai faatasi ma lona igoa ma le faamatalaina “O le Iunivesite o le Pasefika i Saute” (ua faasinomia i la tatou Feagaiga Tusitusia o “le Iunivesite”).
2. O le Ao o le Iunivesite, Faa-Ao o le Iunivesite, Pule ma isi tagata uma o i latou ia, i le taimi nei o lo o avea ma sui o le Iunivesite e tusa ai ma lenei Feagaiga Tusitusia ma Tulafono a le Iunivesite ua aofia ai e amata atu nei e oo i le faavavau o le a tatau ona avea ma Faalapotopotoga Faaupufai e tasi ma ua Tuufaatasia Faaletulafono faatasi ai ma soloaiga lē motusia ma se Faamaufaailoga ua faaigoa ma taua, “O le Iunivesite o le Pasefika i Saute”, ua i ai le malosiaga ma le mafai gafatia i lona igoa e molia ai ma faia ai moliaga, e aveina, faatau mai, umia, totogi, faatau atu, faafesuiai, faaliliuina atu, po o le faatau ese atu i se isi faiga e ese ai, o meatotino tumau ma meatotino tau le tagata lava ia, ina ia faafaigaluegaina, faaune atu po o le nono mai o tupe, ma, i le noatia ma le fai fuafua i le tatou Feagaiga Tusitusia lenei e faatino isi lava gaoioiga e pei ona faia e Faalapotopotoga ua Tuufaatasia Faaletulafono ia ua faavaeina i le Feagaiga Tusitusia,

24 *Teuteuga o le Tulafono o le Aoga* 2019, Nu. 26
Tau Faatoaga a le Iunivesite o le Pasefika i Saute

e mafai ona faia; ma o le a tatau ona i ai i le Iunivesite le faavae ma malosiaga, ma ia noatia i aiaiga ua faatonuina po o ua aofia ai i totonu o le Tatou Feagaiga Tusitusia lenei.

3. O le a avea ma sini o le Iunivesite le tausia, faalautele ma faasoa atu le malamalama e ala i le aoaoina, galuega faufautua faapitoa, ma faia sailiiliga faapitoa ma isi faiga e ese ai faapea ma le tuuina atu i laasaga talafeagai o aoaoga ma aoaoga faamasani e tali atu ai i le soifua manuia ma manaoga o atunuu o le Pasefika i Saute.
4. O le a tatau i le Iunivesite i le noatia ma le fai fuafua i le Tatou Feagaiga Tusitusia lenei ma Tulafono ona i ai o malosiaga nei:
 - (a) ia faavaeina ai Tulaga Tau Tomai Maoae, Tulaga Faa-Faiaoga Taualoa, ma Faiaoga ma isi tofiga o so o se ituaiga ma e tusa lava pe o ni tulaga tau aoaoga pe leai foi, e pei ona mafai ona iloiloaina e le Iunivesite ua talafeagai ai; ia tofia tagata i ma ia aveesea mai i latou mai ia ituaiga tofiga ma ia faatonuina o tuutuuga o a latou galuega, ma ia i ai ni aiaiga mo a latou amioga pulea;
 - (b) ia tuuina atu le tulaga o le avea ma sui o le afaigaluega tau tomai o le Iunivesite i tagata tonu e tatau ai mo ia faamoemoega, ma vaitaimi i tofi e pei ona mafai ona fuafuaina e le Iunivesite mai lea taimi i lea taimi;

- (c) ia faatonuina i totonu o Tulafono, Tulafono na pasia a o lumanai le Tutoatasi po o Tulafono Faatonutonu o tuutuuga ia o le a mafai ai ona taliaina tagata ma vasega o tagata, i le Iunivesite mo le faamoemoe ina ia tuliloa so o se polokalame o mataupu o lo o aotauina ai i le Iunivesite;
- (d) ia tuuina atu e ala i polokalame ma mataupu o aoaoga ma i se isi faiga e ese ai, aoaoga ma aoaoga faamasani i ia laasaga faatulagaina, ma e ala i ni faiga, e aofia ai aoaoga faavaitaimi i fafo atu o le Iunivesite e pei ona mafai ona manatu le Iunivesite ua talafeagai ai, ma ia faia ni aiaiga mo galuega faufautua faapitoa ma sailiiliga faapitoa faapea le tausiga, faalautele ma le faasoaina atu o tomai i sea faiga e pei ona mafai ona fuafuaina e le Iunivesite;
- (e) ia saunia ni tau taualoa e pei o Faatupega o Tulaga Tau Aoaoga Mauaialuga mo Vaitaimi Pupuu, Sikolasipi, Lagolago Tau Tupe mo Aoaoga, Tulaga Tau Tagata Aoga, Faailoga ma isi fesoasoani i tulaga tau aoaoga ma sailiiliga faapitoa;
- (f) ia talia suega ua pasi ma vaitaimi o aoaoga na aoga ai i isi iunivesite ma isi faalapotopotoga po o itutino e tulaga tutusa ma ia suega ma vaitaimi o aoaoga i le Iunivesite e pei ona mafai ona fuafuaina e le Iunivesite ma ia faalēaogāina le taliaina, i so o se taimi;

- (g) ia faamatuu ma faaee atu, i lalo o tuutuuga ua faataatia i Tulafono, Tulafono na pasia a o lumanai le Tutoatasi po o Tulafono Faatonutonu, o Tikeri, Tipiloma, Tusi Pasi Faamaonia ma isi tusi e tulaga ese ai po o tau taualoa o aoaoga ua faamaonia e le Iunivesite ma ua agavaa mo le faamatuuina atu, ina ia ogatasi ma manaoga o le Iunivesite;
- (h) ia faaee atu faailoga tulaga ese e aofia ai Tikeri o Tulaga Faaeaina i tagata ua faamaonia: ae vagana ai o ia faailoga uma e tulaga ese o le a tatau ona faaee atu i le noatia ma le fai fuafua i so o se aiaiga lea ua faia po o ua mafai ona faia e faasino i ai i totonu o Tulafono, Tulafono na pasia a o lumanai le Tutoatasi po o Tulafono Faatonutonu;
- (i) i se tulaga ua manatu le Iunivesite ua tatau ai ona avea o se mafuaaga lelei, le taofia mai o tagata o, pe faalēaogā so o se Tikeri, Tipiloma, Tusi Pasi Faamaonia po o isi faailoga tulaga ese ai po o faailoga taualoa ua faamatuu atu po o ua faaee atu e le Iunivesite;
- (j) ia faia aiaiga mo auaunaga tau saililiga faapitoa, tusi ata, atinae, suesuega ma auaunaga faufautua ma, faatasi ai ma nei faamoemoega, ia faia faatulagaga o lea ituaiga ma isi o faalapotopotoga po o itutino e pei ona manatu le Iunivesite ua talafeagai ai ma tuuina atu i tagata

Tau Faatoaga a le Iunivesite o le Pasefika i Saute

o lo o faaaogāina nei auaunaga o totogifuapauina mo ia auaunaga e pei ona manatu le Iunivesite ua talafeagai ai;

- (k) ia aiaia ai mo amioga pulea a tagata aooga o le Iunivesite;
- (l) mo le manuia o tulaga tau aooga o tuuina atu, aooga faamasani, galuega faufautua faapitoa ma sailiiliga faapitoa mo atunuu o le Pasefika i Saute, ia galulue faatasi, fesootai ma po o le galulue feoeoeai ma isi faalapotopotoga po o itutino, ina ia tofia se toatasi (1) po o le sili atu o tagata e fai ma sui i ai, ina ia amanaia sui ua filifilia o le afaigaluega e avea ma sui auai o le afaigaluega tau tomai o le Iunivesite, ina ia talia sui auai ua filifilia o le afaigaluega tau aoga o le Iunivesite, ina ia talia le afaigaluega filifilia tau tomai o i ai i so o se tulaga taualoa o le Iunivesite, ma ia talia le auai i mataupu tau aooga mo faamoemoega o polokalame ma mataupu tau aooga i le Iunivesite (i tulaga uma i luga o tuutuuga ma aiaiga ia, e pei ona mafai ona fuafuaina e le Iunivesite mai lea taimi i lea taimi); ma ia faalēaogā pe faamuta i so o se taimi so o sea sootaga, soofaatasi, galulue faatasi, tofiga, tulaga amanaia, ulufale po o le taliaina aloaia;
- (m) ia sainia so o se maliega mo le tuufaatasia ai i totonu o le Iunivesite o so o se isi lava faalapotopotoga po o se itutino, ma le

faaogāina o aia tatau, meatotino, noataga ma galuega e fesootai i ai;

- (n) ia aiaia ai mo ituaiga lomiga ma lomiga faasalalau e pei ona mafai ona fuafuaina e le Iunivesite ua talafeagai ai mo le faalauteleina o ona faamoemoega;
- (o) ia fuafuaina, tapa ma taulimaina totogifuapauina;
- (p) ia saunia fale, ia tausia, faafoe, tagofia, lafoaia o ma, i le noatia ma le fai fuafua i le Tatou Feagaiga Tusitusia lenei ma Tulafono, ia faafaigaluegaina o meatotino uma, tupe, aseta atoa ma aia tatau uma a le Iunivesite ma ia auai i galuega ma ia talia noataga ma aitalafu i ona tulaga uma e aunoa ma le faatapulaaina i so o se itu ma i le faiga lava lea e tasi e pei ona mafai ona faafoe e se tagata e toatasi o ana ia lava mataupu;
- (q) ia faavae ma tausia, ma ia faafoe ma pulea aoga mo le nonofo ai o tagata aoga, ma ia laisene ma vaavaaia nei aoga ma isi nofoaga o nonofo ai tusa lava pe o tausia pe leai foi e le Iunivesite;
- (r) ia faia sailiga tupe ma faamautu saofaga e tuuina atu i faaputugatupe a le Iunivesite i le auala lea ma mo faamoemoega faapea e pei ona mafai ona fuafuaina e le Iunivesite ua talafeagai ai mai lea taimi i lea taimi;
- (s) ia galue faapei o se tausii mavaega po o se pule o so o se meatotino, meatotino tuufaasolo, meaalofa, meaalofa tuufaasolo po o se meaalofa

Tau Faatoaga a le Iunivesite o le Pasefika i Saute

o umia e faalauteleina ai sini ma faamoemoe o le Iunivesite; ma teufaafaigaluegaina so o se tupe faapea ina ia ogatasi ma Tulafono;

- (t) ia tuuina atu pui puigamalu mo le totogiina o so o se tupe po o aofaiga o tupe, po o le faatinoga o so o se konekarate po o noataga e so o se kamupani, faalapotopotoga, sosaiete po o tagata pe afai ua manatu le Iunivesite ua tataua ona faanatinati ma ia ogatasi ma ona faamoemoega, e faia ai faapea;
- (u) ia aiaia ai mo tau i po o isi faiga e ese ai, i le tulaga lautele e faapea, e mafai e le Iunivesite ona faanatinati ma ia ogatasi ma ona faamoemoega, oloa ma auaunaga (e aofia ai, e aunoa ma le faatapulaaina o le tulaga lautele o mea ua taua muamua, ma apitaga e nonofo ai) mo sui o le Iunivesite ma o latou aiga, malo ma tagata fesoasoani ma, afai e talafeagai ai, mo sui o tagata lautele. *Ua tuufaatasia ai teuteuga ua faamaonia e Lana Maiesetete ia Oketopa 2008 ma Tesema 2009;*
- (v) ia totogi alauni malaga ma tupe faaalu i le Ao o le Iunivesite ma so o se sui o le Fono po o le Senate po o so o se komiti o le Fono, po o le Senate e tusa ai o so o se malaga e tulai mai i, ma i le taimi a o faagasolo le faatinoga o ona malosiaga po o le faatinoga o ona tiute ma ana galuega tauave, i le aveai ai o ia ma Ao o le Iunivesite po o se sui e pei ona uluai taua;

- (w) ia sainia feagaiga o inisiua e inisiua ai le Ao o le Iunivesite ma so o se sui o le Fono po o le Senate, po o so o se komiti o le Fono po o le Senate e faasaga i tupe gau mai faalavelave tutupu faafuasei tau le tagata lava ia ua mafua ona o, ma i le faagasologa o le faatinoga o ona malosiaga po o le faatinoga o ona tiute ma galuega tauave i le avea ai ma Ao o le Iunivesite, po o se sui e pei ona uluai taua, ma totogi atu saofaga totogi faavaitaimi e tusa ai ma ia feagaiga;
 - (x) e pei ona talafeagai ai, ia faaauau pea ma faalautele atu galuega ma faatinoga, ia e oo mai i le asō o lo o faatino e le Fono Lē Tumau a le Iunivesite o le Pasefika i Saute;
 - (y) ia faaauau le tauaveina e pei ona tauave ai e le Fono Lē Tumau o le Iunivesite o le Pasefika i Saute ana aia tatau, meatotino, noataga, ma galuega;
 - (z) ia faia isi galuega ma mea uma tusa lava pe na tulai mai faafuasei ona o malosiaga ua uluai taua pe leai foi, e pei ona manatu le Iunivesite ua talafeagai ai po o le faanatinati ina ia faalautele atu ai ona faamoemoega.
5. O le a tatau ona i ai se Ao o le Iunivesite, o ia lea o le a avea ma faauluuluga o le Iunivesite.
6. O le a tatau ona i ai se Faa-Ao o le Iunivesite o ia lea o le a avea ma Taitaifono o le Fono e faafoe ana fonotaga.

I le toesea ai o le Ao o le Iunivesite po o, a o avanoa ai le tofi o le Ao o le Iunivesite, o le a tatau ona faataunuu ma faatino e le Faa-Ao o le Iunivesite, o galuega tauave uma a le Ao o le Iunivesite, i le noatia ma fai fuafua i Tulafono.

7. O le a tatau ona i ai se Pule o le Iunivesite, o ia lea o le a avea ma faiaoga autu tau tomai faapitoa ma ofisa sili tau pulega o le Iunivesite.
8. E tatau ona tasi (1) po o le sili atu foi Sui Pule o le Iunivesite, o ia lea e tatau i le noatia ma le fai fuafua i Tulafono, ona faataunuuina ma faatino ia malosiaga ma galuega tauave a le Pule o le Iunivesite e avea ai ma Pule po o, pe afai ua lē mafai ona galue le Pule ona o le lē atoatoa o le malosi, e mafai e le Fono ona tuuina atu malosiaga i se isi tagata.
9. O le a tatau ona i ai se Resitara o le Iunivesite, o ia lea o le a nafa ma ia vaega tau le pulega o le Iunivesite e pei ona mafai ona fuafuaina e le Pule mai lea taimi i lea taimi.
10. O le a tatau foi ona i ai nisi tagata ofisa faapea o le Iunivesite e pei ona mafai ona fuafuaina e le Fono mai lea taimi i lea taimi.

32 *Teuteuga o le Tulafono o le Aoga* 2019, Nu. 26
Tau Faatoaga a le Iunivesite o le Pasefika i Saute

11. O le uluai Ao o le Iunivesite, Faa-Ao o le Iunivesite, Pule ma le Resitara o tagata ia e tatau ona i ai o latou suafa i totonu o le Faamatalaga Muamua o la tatou Feagaiga Tusitusia lenei.
12. Ua soloia le Mataupu 12.
13.
 - (1) O le a tatau ona i ai se Fono a le Iunivesite (i totonu o le Tatou Feagaiga Tusitusia, lea ua taua “o le Fono”) lea e faapea, i le noatia ma le fai fuafua i lenei Feagaiga Tusitusia ma Tulafono, o le a tatau ona avea ma faalapotopotoga e pulea le Iunivesite.
 - (2) E tatau i le Fono ona i ai le puipuigamalu ma le faaaogāina o le Faamaufaaailoga ma e tatau foi ona fitoitonu i ai le pulega o le Iunivesite. *Ua tuu faatasia teuteuga ua faamaonia e Lana Maiesetete ia Oketopa 2008 ma Tesema 2009.*
 - (3) O le a tatau i le Fono ona i ai, le faafoega lautele o le faatinoga o mataupu a le Iunivesite, ma e mafai ona faatino e avea ai i latou ma sui o le Iunivesite o malosiaga uma ua faaee atu i luga o le Iunivesite e lenei, “O La Tatou Feagaiga Tusitusia, ma o le a tatau ona i ai ma isi malosiaga uma, o tiute ma galuega tauave e pei ona o le a mafai ona faaee atu i ai e Tulafono.
14. O le a tatau ona i ai se Senate o le Iunivesite (i lenei, O La Tatou Feagaiga Tusitusia lea ua taua “o le Senate”) i le noatia ma le fai fuafua i malosiaga, tiute ma galuega

tauave a le Fono e pei ona aiaia ai i totonu o lenei, O La Tatou Feagaiga Tusitusia ma Tulafono, e tatau ona fitoitonu ma le Fono mo le aoaoina, sailiiliga faapitoa ma isi aoaoga tau tomai a le Iunivesite, mo le faamautinoaina o le tulaga aupito sili ona manaomia o ia ituaiga aoaoga, sailiiliga faapitoa ma isi galuega ma, mo le faatonutonuina faaetulafono ma le vaavaaiga aoao o aoaoga, aoaoga faamasani ma le amio pulea o tagata aooga o le Iunivesite.

15. (1) I le noatia ma le fai fuafua i lenei, O La Tatou Feagaiga Tusitusia ma Tulafono, o le a tatau ona faavaeina nisi lava aoga, po o itutino ma nisi komiti, e pei ona manatu le Fono ma le Senate po o se tasi o i laua ia, mai lea taimi i lea taimi ua faapea ona talafeagai po o ua tatau ai mo le faafoega o mataupu a le Iunivesite.
- (2) E mafai taitoatasi e le Fono ma le Senate e ala i iugafono ma faasilasilaga tusitusia e tuuina atu i le tagata po o itutino, ona tuuina atu so o se tasi o la malosiaga, tiute ma galuega tauave i:
 - (a) se sui po o se soakomiti o le Fono po o le Senate; po o
 - (b) i le Pule po o isi tagata faigaluega o le Iunivesite.
- (3) E lē faaaogāina le faafuaiupu (2) i malosiaga lautele ua faapea ona tuuina atu po o so o se malosiaga, tiute po o galuega tauave, lea ua faamaotiina i lenei Feagaiga Tusitusia po o Tulafono, e lē mafai ona tuuina atu.

34 *Teuteuga o le Tulafono o le Aoga* 2019, Nu. 26
Tau Faatoaga a le Iunivesite o le Pasefika i Saute

- (4) O Tulafono po o le tuuina atu o malosiaga lava ia, e mafai ona faatapulaaina ai le faatinoga o so o se malosiaga tuuina atu.
 - (5) Ae vagana ai, ma seia vagana ua faalēaogāina so o sea malosiaga ua tuuina atu, o le a tatau ona faaauau pea ona faamalositia e tusa ai ma lona faamoemoe.
16. (1) O le a tatau ona i ai se faalapotopotoga a tagata aoga o le Iunivesite.
- (2) E matua leai se tulaga e faapea o le a noatia ai le Iunivesite i ni aitalafu, noataga ma nisi tupe totogi faatupulaia, po o mo so o se gaoioiga ua faia po o ua lē faia e sea faalapotopotoga o tagata aoga.
17. I le noatia ma le fai fuafua i le Tatou Feagaiga Tusinga, e mafai i Tulafono ona faatulaga pe faatonutonuina faaletulafono i le a lava le tulaga e mafai ai:
- (a) le tulaga aloaia, tofiga ma le faaauauina i le tofi o le Ao o le Iunivesite, Faa-Ao o le Iunivesite, Pule, Sui Pule, Resitara ma isi tagata ofisa o le Iunivesite;
 - (b) le faavae, malosiaga tiute ma galuega tauave (i le a lava le tulaga e mafai ai) o le Fono ma le Senate;
 - (c) o isi lava mataupu uma e pei ona manatu le Fono ua talafeagai ai ma ua faamalositia ai, e tusa ai o, po o mo le puleaina o le Iunivesite,

o ona sui ma vaega a aofia ai po o i se isi faiga e ese ai mo le uunaia o sini o lenei Feagaiga Tusitusia.

18. (1) O Tulafono ua faatulagaina i totonu o le Faamatalaga Lona Lua o lenei, O La Tatou Feagaiga Tusitusia o le a tatau ona avea ma uluai Tulafono o le Iunivesite ma o le a tatau ona tumau pea ona faamalosia seia vagana ua i ai se faaopoopoga i, teuteuina po o ua soloia i le faiga ua faatonuina i le parakalafa (2) o lenei Mataupu. *Ua tuufaatasia teuteuga ua faamaonia e Lana Maiesetete ia Oketopa 2008 ma Tesema 2009.*
- (2) E mafai e le Fono e ala i se Iugafono Faapitoa ona faia Tulafono ia e mafai ona faaopoopo atu i, teuteu po o le soloia o Tulafono o faamalosia mo le taimi nei, ae vagana ai e faapea o so o sea faaopoopoga, teuteuga po o le soloia o le a lē ogatasi ai ma lenei Feagaiga Tusitusia.
19. I le noatia ma le fai fuafua i lenei Feagaiga Tusitusia ma Tulafono, e mafai e le Fono ona faia Tulafono ma e mafai foi e le Senate ona faia Tulafono Faatonutonu e limataitaiina ma faatonutonuina ai faaletulafono le Iunivesite ma ana pulega ma sui auai. O le malosiaga e faia ai Tulafono ma Tulafono Faatonutonu e tatau ona aofia ai le malosiaga e faia ai faaopoopoga i, teuteu po o e soloia ai Tulafono ma Tulafono Faatonutonu ua faia e oo mai i le taimi nei.

36 *Teuteuga o le Tulafono o le Aoga* 2019, Nu. 26
Tau Faatoaga a le Iunivesite o le Pasefika i Saute

20. E mafai ona faatonuina e Tulafono e faapea, o so o se mataupu ua faatagaina po o ua faatonuina i totonu o lenei Feagaiga Tusitusia e ao ona faatulagaina pe faatonutonuina faaletulafono e Tulafono, e tatau ona toe faalautele atu le faatulagaina po o le faatonutonuina e Tulafono po o Tulafono Faatonutonu: ae vagana ai e faapea, o so o sea tulaga ua faalauteleina ai ona toe faatulaga po o tulafono faatonutonu, o le a lē tatau ona lē ogatasi ai ma le Tatou Feagaiga Tusitusia po o Tulafono.
21. (1) O le a tatau ona avea ma tiute tauave o le Fono le faasee atu i le Senate o so o se mataupu ua manatu le Fono e i ai ni ona aafiaga tuusao i matafaioi tau tomai a le Senate, ma e le i iloiloina muamua e le Senate, po o ia ua i ai i se finagalo o le Fono, le tatau ona tagofia e le Senate.
- (2) O le a tatau ona avea ma tiute o le Senate le tuuina atu i luma o le Fono o so o se mataupu ua i luma o le Senate lea ua manatu o ia o le a i ai aafiaga tau tupe po o, i so o se tulaga o le a aafia ai le tulaga manuia lautele o le Iunivesite, po o ona sootaga ma tagata po o faalapotopotoga i fafo atu o le Iunivesite.
22. E lē tatau ona taofia se tagata mai le taliaina ai e avea ma tagata aoga, i le tofia ai e avea ma sui o le aufaigaluega o le Iunivesite, mai le umia o so o se tofi, tulaga tau faamanuiaga po o se tulaga aloaia i totonu

o le Iunivesite, po o mai le faauu ai i le Iunivesite ona o ni mafuaaga e pei o ona talitonuga faale-lotu po o talitonuga faaupufai, ituaiga o tagatanuu po o le mafuaaga o so o se aafiaga o le lē atoatoa o le malosi o le tino ma le mafaufau o lena tagata.

23. (A) O le a tatau ona avea ma matafaii a le Iunivesite le faaaogāina o taiala aloaia e faamautinoa ai le taofiofi mau ma le faamalosia o taiala faavae o le saolotoga o tomai aoaoina;
- (B) E tatau ona agavaa tutusa alii ma tamaitai mo so o se tulaga tofi po o tofiga i totonu o le Iunivesite, po o mo le avea ai ma sui o so o se faalapotopotoga, itutino po o komiti a le Iuniveste ma o Tikeri, Tipiloma ma Tusi Pasi Faamaonia uma, ma isi faailoga maualuluga po o tau taualoa ma polokalame uma faapea mataupu tau aoaoga i le Iunivesite, lea e tatau ona avanoa tutusa i ai alii ma tamaitai.
24. E lē tatau i le Iunivesite ona faia so o se tufatufaga, meaalofo, vaevaega po o ponesi tau tupe i, po o i le va o so o se tasi o ona sui seia vagana ai o se faiga e ala i faailoga, tau taualoa po o se tupe faameaalofo faapitoa.
25. (1) E mafai e le Fono, i so o se taimi lava ona faaopoopo i, teuteu pe soloia lena Feagaiga Tusitusia e ala i se Iugafono Faapitoa ma o sea faaopoopoga, teuteuga po o le soloia ai, o le a

tatau pe a faatagaina e i Matou, O o Matou Suli po o Tagata e Soloai ane i ai o lo o i le Fono, ona aloaia ina ia tatau ona faaauau ai pea La Tatou Feagaiga Tusinga ma faagaioia ai e faapei ai ona faaopoopo i, teuteu ai po o ua soloia i le faiga e pei ona uluai taua.

- (2) O le a tatau ona faaogaina leni Mataupu i la tatou Feagaiga Tusinga leni e faapei ona faaopoopoina, teuteu po o ua soloia i le faiga e pei ona uluai taua.
- 26 (1) Mo le faamoemoe o leni Feagaiga Tusinga, o se "Iugafono Faapitoa" o lona uiga o se Iugafono na pasia i se fonotaga e tasi a le Fono, na fulisia ai i le ioega a le Vaega aupito i toatele o sui e lē itiiti ifo i le tolu-vae-fa o i latou na auai ma palota, ma o lea fonotaga na faapea ona tuuina atu ai se faasilasilaga i sui taitasi o le Fono, e lē itiiti ifo ma le sefulufa aso a o lumanai ai le usuia o le fono, ma faamaonia e ala i se Iugafono na pasia e se vaega aupito i toatele i le fonotaga na sosoo ai mulimuli ane a le Fono, lea na faapea ona tuuina atu ai le faasilasilaga, ma o lea fonotaga e usuia e lē itiiti ifo ma le tasi (1) le masina faale-kalena i le tuana'i ai o le fonotaga muamua. *Ua tuu faatasia teuteuga ua faamaonia e Lana Maiesetete ia Oketopa 2008 ma Tesema 2009.*
- (2) Ae vagana ai le mataupu o le Iugafono lea na manaomia le pasia i le fonotaga muamua o fono e lua (2) o lo o taua i le parakalafa (1) o leni

Mataupu, e tatau ona faatatauina e faapea na pasia se Iugafono i se fonotaga a le Fono pe afai na pasia e aunoa ma se fonotaga na faia ina ia tusa ai ma se taualumaga e faatonuina e Tulafono ia o le a limataitaiina ai le faasalalauina atu o le Faaiuga i sui uma o le Fono i lea taimi, ma faamaonia e ala i ni sainiga lima a sui e lē itiiti ifo i le tolu-vae-fa o na sui e aofia ai sea aofaiga o sui mai atunuu i totonu o le Pasefika i Saute e ese mai ia Fiti, e pei ona faamaotiina i totonu o Tulafono ua taua: ae vagana ai e faapea e mafai e so o se sui o le Fono e ala i se faasilasilaga i le Iunivesite, ona manaomia le tulaga ia lē pasia le Iugafono, seia vagana ai ua faia i se fonotaga a le Fono.

27. E mafai e le Fono ona faamaonia, e ala i se Vaega aupito i toatele o sui auai, le tofiga o se Tagata Asiasi o le Iunivesite mo sea vaitaimi ma faatasi ai ma ia tiute tauave e pei ona fuafuaina e le Fono. O le a avea ma faaiuga mausali le faaiuga a le Tagata Asiasi e uiga i mataupu o aofia ai i totonu o lana puleaga.
28. O le Naunautaiga ma le Manaoga Tuumavaega Faa-Maiesetete i totonu o lenei Feagaiga Tusitusia, e tatau ona faatumau lona faauigaina i le agaga fesoasoani ma le loto lelei, i se tulaga e manuia ai le Iunivesite, ma le faalauiloaina o sini autu o le Tatou Feagaiga Tusitusia.

40 *Teuteuga o le Tulafono o le Aoga* 2019, Nu. 26
Tau Faatoaga a le Iunivesite o le Pasefika i Saute

E AVEA AI MA MOLIMAU i lea tulaga ua Matou Faia ai o nei tusi e avea o ni Pepa Aloaia o Aia Tatau Tau Meatotino.

UA MOLIMAUINA e i Matou lava i Westminster i le aso sefulu o Fepuari i le tausaga lona sefulu ma le iva o la Matou Nofoaiga.

DOBSON

E ALA I SE TUSI FAAPOLOAIGA NA FAIA I LALO O LE SAINI AAO A LE TUPU TAMAITAI

FAAMATALAGA 4

(Fuaiupu 2)

TULAFONO O LE USP

TULAFONO O LE IUNIVESITE O LE PASEFIKA I SAUTE

VAEGA 1 - FAATOMUAGA

1. Faamatalaina o uiga o upu..... 2
2. Faamatalaina o uiga o Tulafono..... 3
3. Aso e Amata Faamamaluina ai..... 3

VAEGA 2 - TAGATA OFISA O LE IUNIVESITE

4. Tagata Ofisa o le Iunivesite..... 3

Tau Faatoaga a le Iunivesite o le Pasefika i Saute

5. O le Ao o le Iunivesite.....	4
6. O le Faa-Ao o le Iunivesite.....	4
7. Pule o le Iunivesite ma le Peresetene.....	4
8. Sui Pule o le Iunivesite.....	6
9. Sui Peresetene.....	6
10 Tagata Asiasi.....	6
11 O le Tagata Suetusi.....	6

VAEGA 3 - FONO MA KOMITI O LE FONO

12. O sui auai o le Fono.....	7
13. O isi sui e suitulaga.....	8
14. Taiala faavae mo le avea ai ma sui auai.....	8
15. O le Sui Taitaifono o le Fono po o Sui Faa-Ao o le Iunivesite.....	9
16. Vaitaimi i le Tofi.....	9
17. Tuua o le Tofi	10
18. O avanoa faigaluega lautele.....	10
19. E lē aafia taualumaga a le Fono i avanoa o tofiga ma isi.....	10
20. Faailoaina o aia	10
21. Malosiaga, tiute ma galuega tauave a le Fono.....	11
22. Fonotaga a le Fono.....	12
23. Faasalalauina o Iugafono a le Fono.....	12
24. Komiti Tau Pulega o le Fono.....	13
25. O isi Komiti o le Fono.....	13
26. O le tuuina atu o malosiaga.....	14

VAEGA 4 - O LE SENATE

27. O sui e aofia ai i le Senate..... 14
28. Matafaioi a le Senate..... 15
29. O malosiaga o le Senate..... 15
30. Fonotaga a le Senate ma Komiti o le Senate..... 16

VAEGA 5 - O AMIOGA PULEA MA ISI TULAGA A LE AUFAIGALUEGA MA TAGATA AOOGA

31. O amioga pulea a le aufaigaluega..... 17
32. Taliaina ma le faafoega o amioga pulea a tagata
aooa..... 17

VAEGA 6 - AIAIGA ESEESE

33. Taulumaga..... 17
34. O le faaooina atu o faasilasilaga ma pepa aloaia..... 18
35. Aiaiga tau soloaiga..... 18

VAEGA 1 FAATOMUAGA

1. **Faamatalaina o uiga o upu:**
(1) I totonu o nei tulafono, ae vagana ai ua manaomia e le mataupu se isi uiga e ese ai:
“faiaoga tau tomai faapitoa” o lona uiga o Polofesa, o le Tagata Tausi Tusi i le Faletusi o le Iunivesite, Polofesa Lagolago, Faiaoga

Sinia ma Faiaoga o le Iunivesite; ma e aofia ai isi lava tagata ma vasega o tagata e pei ona fuafuaina e le Fono;

“vaega tau aoaoga o tomai faapitoa” o lona uiga o matata tau aoaoga, aoga, vaega tau aoaoga i mataupu faapitoa, inisetiute, nofoaga autu tau aoaoga ma isi vaevaega tau aoaoga e manaomia ai le faasoasoina maoti o tulaga tau tupe;

“Feagaiga Tusitusia” o lona uiga o le Feagaiga Tusitusia o le Iunivesite;

“Fono” o lona uiga o le Fono a le Iunivesite;

“Komiti Tau Pulega” o lona uiga o le Komiti Tau Pulega a le Fono;

“Atunuu o Avea ma Sui Auai” ua faasino i atunuu ua taua i totonu o le Tulafono 12(1)(c), (d) ma le (e);

“Tulafono” o lona uiga o Tulafono ua faia e tusa ai ma le Feagaiga Tusitusia po o nei Tulafono;

“Itulagi” o lona uiga o le nofoaga i le faafanua ua aofia ai atunuu o avea ma sui auai o le Iunivesite ma “sui auai faaitulagi” ua faasino lea i atunuu o avea ma sui po o latou tagata ua tofia i le Fono;

“Tulafono Faatonutonu” o lona uiga o Tulafono Faatonutonu ua faia e tusa ai ma le Feagaiga Tusitusia po o nei Tulafono;

“Senate” o lona uiga o le Senate o le Iunivesite;

“Faalapotopotoga a Tagata Aooga” o lona uiga o le Faalapotopotoga a Tagata Aooga o le Iunivesite po o isi lava faalapotopotoga a tagata aooga o le Iunivesite e pei ona amanaia e le Fono mo faamoemoega o nei Tulafono;

“Iunivesite” o lona uiga o le Iunivesite o le Pasefika i Saute;

“Tausaga” o lona uiga o se tausaga faale-kalena.

- (2) O upu ua faamatala manino i totonu o le Feagaiga Tusitusia po o nei Tulafono o le a tatau ona i ai uiga tutusa i totonu o Tulafono ma Tulafono Faatonutonu seia vagana ai ua manaomia e le mataupu se isi uiga e ese ai.
- (3) Ae vagana ai ua suia le igoa o so o se tagata ofisa o le Iunivesite, po o se tulaga tofi po o so o se atunuu o avea ma sui auai, ae peitai o lo o tumau pea le tofiga, tulaga tofi po o le atunuu, po o ua mulimuli ane o lo o mautu le tulaga tutusa pea ma lea o lo o faapea ona faamatalaina i totonu o nei Tulafono, o le a tatau ona faitauina nei Tulafono e faapei ai o lo o faasino i le tagata ofisa, tulaga tofi po o le atunuu lava lea e tasi.

2. Faamatalaina o uiga o Tulafono:

E tatau ona faamatalaina uiga o nei Tulafono i sea faiga ina ia lē feteenai ai ma le Feagaiga Tusitusia.

3. Aso e Amata Faamamaluina ai:

- (1) O nei Tulafono e amata faamamaluina i le aso 17 o Me, 2016.
- (2) O Tulafono na faapea ona faamamaluina mai le aso 1 o Aokuso 2009, o le a muta le aloaia mai le aso na amata faamamaluina ai teuteuga o Tulafono, i le noatia ma le fai fuafua i lenei Tulafono ma aiaiga tau soloaiga o lo o i le Tulafono 35.
- (3) O so o se Tulafono po o tulafono faatonutonu na faia po o, na faatagaina e le Fono a le Iunivesite i lalo o aiaiga o Tulafono ua soloia:
 - (a) o le a faaauau pea ona faamamaluina e faapei ai na faia i lalo o nei Tulafono;
 - (b) e mafai ona teuteuina ma soloia pe a ua talafeagai ai.
- (4) O gaoioiga ma faaiuga taitasi uma a le Fono, le Senate o le Iunivesite po o se tagata ofisa o le Iunivesite lea na faia maeaea i lalo o Tulafono ua soloia, o le a tatau ona faatatauina e faapea, na faia maeaea i lalo o nei Tulafono.

VAEGA 2

TAGATA OFISA O LE IUNIVESITE

4. Tagata Ofisa o le Iunivesite:

- (1) O tagata ofisa nei o le Iunivesite:
 - (a) o le Ao o le Iunivesite;
 - (b) o le Faa-Ao o le Iunivesite;

- (c) o le Pule (lea foi e mafai ona taua o le Peresetene);
 - (d) o le tasi (1) po o le sili atu foi o Sui Pule; ma
 - (e) Sui Peresetene.
- (2) E mafai e le Fono ona tofia isi lava tagata ofisa e pei ona manatu o ia ua talafeagai ai faatasi ai ma ia tiute tauave, ma i luga o ia tuutuuga ma aiaiga e pei ona ia fuafuaina.

5. O le Ao o le Iunivesite:

- (1) E tatau ona tofia le Ao o le Iunivesite e le Fono mai se tasi o atunuu o avea ma sui auai.
- (2) E tatau ona umia e le Ao o le Iunivesite le tofi mo se vaitaimi e tasi (1) le tausaga.
- (3) E mafai ona faamavae mai le tofi le Ao o le Iunivesite e ala i se faiga tusitusia e faatuatusi atu i le Fono po o, e mafai ona aveesea mai le tofi e ala i se faaiuga a le Fono.
- (4) Afai e avanoa le tulaga tofi o le Ao o le Iunivesite a o lumanai ai ona muta lona vaitaimi i le tofi, o le a tatau ona faatumu le avanoa i le isi fonotaga e sosoo ai a le Fono po o le Komiti Tau Pulega (po o fea lava e muamua ona tulai mai) e se isi tagata mai le atunuu lava lea o avea ma sui auai mo le vaitaimi o totoe o le tagata lea na muamua atu i le tofi.

6. O le Faa-Ao o le Iunivesite:

- (1) E tatau ona tofia le Faa-Ao o le Iunivesite e le Fono, ae vagana ai ua aiaia e faapea o le Faa-Ao o le Iunivesite e lē tatau ona avea ma sui o le aufaigaluega po o se tagata aoga o le Iunivesite.
- (2) E tatau ona umia e le Faa-Ao o le Iunivesite le tofi mo se vaitaimi e tolu (3) tausaga.
- (3) E mafai ona faafou le tofiga o le Faa-Ao o le Iunivesite e le Fono mo isi vaitaimi faaopoopo e oo atu i le tolu (3) tausaga.
- (4) Afai ua tofia se tagata o ia lea e le o se sui o le Fono, e avea ma Faa-Ao o le Iunivesite, o le a tatau loa ona avea lea tagata i le taimi o lona tofiga ma sui o le Fono ua aloaia e ala i lona tofi.
- (5) Afai ua tofia se sui o le Fono e avea ma Faa-Ao o le Iunivesite, ua avanoa loa lona tofi o le Sui o le Fono, ma o le a tatau ona tofia se sui fou e le faalapotopotoga lea na tofia lea sui.
- (6) E mafai e le Faa-Ao o le Iunivesite ona faamavae mai le tofi e ala i se faiga tusitusia e faatuatusi atu i le Fono.
- (7) E mafai ona aveesea le Faa-Ao o le Iunivesite mai le tofi e ala i se faaiuga a le Fono.
- (8) Afai e avanoa le tofi o le Faa-Ao o le Iunivesite a o lumanai ai ona muta lona vaitaimi i le tofi, o le a tatau ona faatumu le avanoa i le isi fonotaga e sosoo ai a le Fono mo se vaitaimi e oo atu i le tolu (3) tausaga.

7. Pule o le Iunivesite ma le Peresetene:

- (1) O le a tatau ona umia e le Pule o le Iunivesite le tofi mo se vaitaimi e lima (5) tausaga ma, i luga o nisi lava tuutuuga ma aiaiga e pei ona fuafuaina e le Fono.
- (2) E mafai ona toe faafou e le Fono le konekarate a le Pule o le Iunivesite mo nisi vaitaimi faaopoopo e oo atu i le lima (5) tausaga.
- (3) E tatau ona tofia le Pule o le Iunivesite e le Fono i luga o fautuaga a se Komiti Soofaatasi o le Fono ma le Senate, lea e ao ona faavaeina e le Fono. E tatau ona faasalalauina faava o malo le avanoa o le tulaga tofi.
- (4) E mafai ona faamavae mai le tofi le Pule o le Iunivesite e ala i se faiga tusitusia e faatuatusi atu i le Faa-Ao o le Iunivesite.
- (5) E mafai ona aveesea mai le tofi le Pule o le Iunivesite e ala i se faaiuga a le Fono.
- (6) E tatau ona tali atu le Pule o le Iunivesite i le Fono i le avea ai o ia ma ofisa sili o tomai faapitoa, ma galuega tau pulega ma le Peresetene o le Iunivesite.
- (7) E tatau ona faatinoina e le Pule o le Iunivesite ona malosiaga tuuina atu, tiute ma galuega tauave ua faia e le Fono po o le Senate, talu ai ona o ia malosiaga tuuina atu o lo o faamaoti i faiga tusitusia.
- (8) O le Pule o le Iunivesite, e pei ona faatonuina i le Tulafono 12, e tatau ona avea o ia ma sui o le Fono.

Tau Faatoaga a le Iunivesite o le Pasefika i Saute

- (9) E mafai e le Pule o le Iunivesite ona valaaulia sui o le aufaigaluega ina ia auai i fonotaga a le Fono.
- (10) O le Pule, e pei ona faatonuina i Tulafono 24 ma le 25, e tatau ona avea o se sui o le Komiti Tau Pulega ma o se sui foi e auai i fonotaga e ala i le tofi o isi komiti uma o le Fono.
- (11) E tatau ona fuafuaina e le Pule o le Iunivesite e ala i feutagaiga ma le Faa-Ao o le Iunivesite pe tatau ona fono e pei ona fuafuaina lelei na i lo fonotaga e pei ona faatonuina i le Tulafono 24.
- (12) E tatau ona fuafuaina e le Pule o le Iunivesite, e pei ona faatonuina i le Tulafono 9, vaega ia tau faafoega o le Iunivesite ia e tatau ona avea ma matafai o le Sui Peresetene.
- (13) E mafai e le Pule o le Iunivesite, e pei ona faatonuina i le Tulafono 26(3) mai lea taimi i lea taimi, e ala i se faiga tusitusia faalauaitele po o i se faiga faapitoa foi, ona tuuina atu malosiaga i so o se sui o le aufaigaluega a le Iunivesite:
 - (a) so o se galuega tauave a le Pule o le Iunivesite i lalo o le Feagaiga Tusitusia po o Tulafono; ma
 - (b) nisi lava o galuega tauave e pei ona tuuina atu e le Fono i le Pule o le Iunivesite i lalo o lenei fuaiupu e pei ona mafai ona faamaonia e le Fono.
- (14) O le a tatau ona avea le Pule o le Iunivesite ma Taitaifono o le Senate ma avea o se sui o le Senate e ala i le tofi, e pei ona faatonuina i le Tulafono 27.

- (15) O le Pule o le Iunivesite, e pei ona faatonuina i le Tulafono 30(3), o le a tatau ona avea ma, ae vagana ai ua aiaia maoti i se isi faiga e ese ai i totonu o so o se Tulafono po o Tulafono, se sui e auai i fonotaga e ala i le tofi i komiti uma o le Senate.
- (16) E mafai e le Pule o le Iunivesite, e pei ona faatonuina i le Tulafono 32, ona:
 - (a) aveeseina po o le faataga le aveeseina o so o se tagata mai so o se vaega o le Iunivesite po o nofoaga ma fale o lo o faaaogāina e le Iunivesite; po o
 - (b) le teena o le taliaina o so o se tagata e avea ma tagata aoga o le Iunivesite.
- (17) E ao i le Pule o le Iunivesite ona lipoti atu i fonotaga taitasi a le Fono e uiga i le faagaoioiga o galuega a le Iunivesite.
- (18) O le a lē aafia ai po o le taofia ai i le tuuina atu o malosiaga i lalo o lenei Tulafono, le faatinoga o so o se galuega tauave a le Pule o le Iunivesite ma, e pei ona faatonuina i le Tulafono 26, e lē aafia ai matafaioi a le Pule o le Iunivesite i gaioioiga a so o se tagata na tuuina atu i ai malosiaga.

8. Sui Pule o le Iunivesite:

- (1) E tatau i le Fono ona fuafuaina mai lea taimi i lea taimi le aofai o Sui Pule o le Iunivesite.

Tau Faatoaga a le Iunivesite o le Pasefika i Saute

- (2) E tatau i se Sui Pule o le Iunivesite ona ia umia le tofi mo se vaitaimi e lima (5) tausaga ma i luga o isi lava tuutuuga ma aiaiga e pei ona fuafuaina e le Fono.
- (3) E tatau ona tofia e le Fono se Sui Pule o le Iunivesite i luga o fautuaga a se Komiti Soofaatasi a le Fono ma le Senate, lea e ao ona faavaeina e le Fono. E tatau ona faasalalauina i atunuu i fafo le avanoa.
- (4) E mafai ona toe faafou le konekarate a se Sui Pule o le Iunivesite mo nisi vaitaimi faaopoopo e oo atu i le lima (5) tausaga.
- (5) E mafai ona faamavae mai le tofi se Sui Pule o le Iunivesite e ala i se faiga tusitusia e faatuatusi atu i le Pule o le Iunivesite.
- (6) E tatau i le Sui Pule o le Iunivesite ona tauaveina o ia tiute tauave e pei ona mafai ona fuafuaina e le Pule.
- (7) E mafai e le Sui Pule o le Iunivesite ona tofia se Sui Pule Lagolago e faatinoina galuega seia vagana ai ua faia se tofiga i lalo o le Tulafono 8(3).

9. Sui Peresetene:

- (1) O le a tatau ona umia e se Sui Peresetene le tofi mo se vaitaimi e lima (5) tausaga, ma i luga o ia tuutuuga ma aiaiga e pei ona fuafuaina e le Fono.

- (2) E tatau ona tofia e le Fono se Sui Peresetene o le Iunivesite i luga o fautuaga a se Komiti Soofaatasi a le Fono ma le Senate lea e ao ona faavaeina e le Fono. E tatau ona faasalalauina i atunuu i fafo le avanoa.
- (3) E mafai ona toe faafou le konekarate a le Sui Peresetene e le Fono mo nisi vaitaimi faaopoopo e oo atu i le lima (5) tausaga.
- (4) E mafai ona faamavae mai le tofi se Sui Peresetene e ala i se faiga tusitusia e faatuatusi atu i le Pule o le Iunivesite.
- (5) O le Sui Peresetene o le Iunivesite e tatau ona fitoitonu i ai ia vaega o le faafoega o le Iunivesite e pei ona mafai ona fuafuaina e le Ao o le Iunivesite mai lea taimi i lea taimi.
- (6) E mafai e le Pule o le Iunivesite ona tofia se Sui Peresetene Lagolago e galue seia vagana ai ua faia se tofiga i lalo o le Tulafono 9(2).

10. Tagata Asiasi:

- (1) E tatau i le Fono ona tofia se Tagata Asiasi o le Iunivesite o ia lea e tatau ona i ai le puleaga e iloiloaina ai so o se feeseeseaiga i le va o le Iunivesite ma so o se sui o le afaigaluega, po o le Iunivesite ma so o se tagata aoga ae vagana ai o le tulaga masani ua leai se isi auala faalotoifale e foia ai se feeseeseaiga.
- (2) E tatau ona fuafua e le Fono le umi o le vaitaimi i le tofi ma tiute tauave o le Tagata Asiasi ma faatulaga i totonu o se Tulafono.

11. O le Tagata Suetusi:

- (1) E tatau ona tofia e le Fono se kamupani o tagata suetusi e avea ma Suetusi o le Iunivesite mo sea vaitaimi ma i luga o ia tuutuuga e pei ona fuafuaina e le Fono.
- (2) E lē tatau ona tofia se kamupani o tagata suetusi, e avea ma suetusi pe afai o lea kamupani po o so o se sui o lea kamupani o lo o galue i le sueina o tusi a le Iunivesite, e i ai se aia feteenai e pei ona faamatala manino i le Tulafono 20(3).
- (3) Afai e avanoa le tofi o le Suetusi a o lumanai ai ona muta le vaitaimi i le tofi, e tatau i le Fono ona faatumu le avanoa i se taimi vave lava e mafai ai ona faatino.
- (4) E mafai e le Suetusi ona faamavae mai le tofi e ala i se faiga tusitusia e faatuatusi atu i le Fono po o, e mafai ona aveesea, e ala i se faaiuga a le Fono.
- (5) E tatau ona agavaa le Suetusi e toe tofia i le tofi.
- (6) E tatau ona i ai i le Suetusi le aia tatau e avanoa ai i taimi uma talafeagai i ia tusi, faamaumauga, faamatalaga tau tupe ma pepa e totogi ai tupe a le Iunivesite ma e tatau foi ona agavaa e tapa mai tagata ofisa o le Iunivesite ia faamatalaga ma faamalamalama e pei ona mafai ona talafeagai ai mo le faatinoga o ona tiute tauave.

VAEGA 3
FONO MA KOMITI O LE FONO

12. O sui auai o le Fono:

- (1) O sui auai nei o le Fono:
 - (a) o le Faa-Ao o le Iunivesite;
 - (b) o le Pule o le Iunivesite;
 - (c) e toatasi (1) le sui e tofia e Malo taitasi o sui auai faaitulagi nei o lo o taua i lalo o le Feagaiga Tusitusia (e ono mafai ona toe teuteuina le igoa) po o, na taliaina mulimuli ane i le Iunivesite e avea ma Atunuu auai -
 - (i) Atu Kuki;
 - (ii) Faiga Malo a Tagatanuu o Kiripati;
 - (iii) Faiga Malo a Tagatanuu o le Atu Malesala;
 - (iv) Faiga Malo a Tagatanuu o Nauru;
 - (v) Niue;
 - (vi) Atu Motu o Solomona;
 - (vii) Tokelau;
 - (viii) Tuvalu;
 - (ix) Malo o Toga;
 - (x) Faiga Malo a Tagatanuu o Vanuatu;
 - (d) o sui auai e toalua (2) e tofia e le Malo o Samoa;
 - (e) o sui auai e toalima (5) e tofia e le Malo o Tagatanuu o Fiti;

Tau Faatoaga a le Iunivesite o le Pasefika i Saute

- (f) o le sui auai e toatasi (1) e tofia e le Malo o Ausetalia ma le Malo o Niu Sila;
- (g) o le Failautusi Aoao o le Ofisa Tutotonu a le Fono a atunuu o le Pasefika po o se sui faatu a le Failautusi Aoao;
- (h) o polofesa e toalua (2) o le Iunivesite e tofia e le Senate a le Iunivesite ina ia tusa ai ma le Tulafono 29(s);
- (i) o sui auai e toalua (2) o le afaigaluega a le Iunivesite, a itiiti mai o le toatasi (1) o i laua nei o se sui o le afaigaluega tau aoaoga e leai ni tomai faapitoa, o le a filifilia pe tofia ina ia tusa ai ma Tulafono talafeagai;
- (j) o ni tagata aooga resitalaina se toalua (2) o le Iunivesite e fai ma sui o le faalapotopotoga o tagata aooga, o le toatasi (1) o i laua nei e fai ma sui o tagata aooga i le aoga o i Laucala, ma le toatasi (1) e fai ma sui o tagata aooga i isi Iunivesite o le itulagi, o tagata aooga uma nei e toalua (2) o le a filifilia pe tofia ina ia tusa ai ma Tulafono talafeagai;
- (k) e oo atu i le toafitu (7) tagata e tofia e avea ma sui o le Fono, a itiiti mai o le toatasi (1) o i latou o se tagata aoga ua pasi atoatoa mai i le Iunivesite ma a itiiti mai o le toatasi (1) o i laua o se tagata mai le Atumotu o Solomona, o ia tofiga

taitasi e ao ona faia ina ia tusa ai ma taiala faavae ua faatulaga atu i le Tulafono 14 ma ia tusa ai ma Tulafono talafeagai.

- (2) O tagata nei e auai i le Fono, ae lē palota:
 - (a) e toatasi (1) pe sili atu foi pule Lagolago o le Iunivesite po o Sui Peresetene e pei ona talosagaina e le Pule;
 - (b) o le Faatonu Tau Pulega o Tupe;
 - (c) o isi sui o le afaigaluega e ala i le talosaga a le Pule;
 - (d) o nisi lava tagata e ala i le talosaga a le Faa-Ao o le Iunivesite.

13. O isi sui e suitulaga:

- (1) E tatau i atunuu taitasi o avea ma Sui Auai faapea Ausetalia ma Niu Sila, ona tofia isi sui e suitulaga o le Fono ina ia auai i fonotaga a le Fono, i le toesea ai o sui tofia i lalo o le Tulafono 12(1)(c), (d), (e) ma le (f).
- (2) O isi sui auai e suitulaga e tatau ona tofia i le taimi lava lea e avea ai ma sui i lalo o le Tulafono 12(1), ma e tatau foi ona toe faafou tofiga i le a lava le taimi e tulai mai ai se avanoa i le tulaga tofi o isi sui auai.

14. Taiala faavae mo le avea ai ma sui auai:

- (1) I le avea ma sui auai i le Fono a le Iunivesite, e ao i le Fono ona amanaia le tulaga manaomia tele o le auai i le Fono o:

- (a) tagata e i ai le poto masani i galuega tau pulega;
 - (b) aia tau tomai faapitoa, pisinisi ma isi aia taua i totonu o le atunuu;
 - (c) tagata aoga ua pasi atoatoa mai le Iunivesite;
 - (d) o se sui talafeagai i le faataotoga o le itulagi;
 - (e) o tagata e maua i ai le tulaga paleni i tausaga ma ituaiga kenera;
 - (f) faalapotopotoga tau tomai faapitoa ma faalapotopotoga faaitulagi o fesootai ma polokalame ua aoaoina i le Iunivesite;
 - (g) so o se faalapotopotoga po o se itutino ua faapea ona galulue faatasi po o ua soofaatasi, po o galulue felagolagomai ma le Iunivesite; ma
 - (h) o faiaoga ua i ai le poto masani mai fafo atu o le Itulagi o i latou ia o lo o i ai o latou sao i felafolafoaiga a le Fono.
- (2) I le tofiaina o sui po o isi sui e suitulaga, e ao i Malo o avea ma sui auai ona amanaia taiala faavae ua faatulaga atu i le parakalafa (1) ma le tulaga manaomia o le tofiaina o sui, o i latou ia:
- (a) e i ai le silafia e uiga i le Iunivesite po o isi Inisetiute faapea;
 - (b) e mafai ona auai i fonotaga ma galuega i tulaga masani a le Fono.

- (3) O le faalapotopotoga e tofia pe filifilia sui (e aofia ai sui e suitulaga) o le Fono, o i latou ia e tatau ona fautuaina le Failautusi o le Fono e uiga i so o se tofiga po o se filifiliga fou e faia i se taimi vave lava e mafai ai ona faatino.

15. O le Sui Taitaifono o le Fono po o Sui Faa-Ao o le Iunivesite:

- (1) E tatau ona tofia e le Fono mai o latou lava sui se Sui Taitaifono o ia lea e le o se sui o le aufaigaluega tau tomai faapitoa po o se tagata aoga po o se tagata ofisa tumau o le Iunivesite.
- (2) E tatau i le Sui Taitaifono ona tuua le tofi pe afai ua muta lona avea ai ma sui o le Fono.
- (3) E tatau i le Sui Taitaifono ona seei i le nofoa pe afai e toesea le Faa-Ao o le Iunivesite, ma e mafai foi ona fai o ia ma sui o le Faa-Ao o le Iunivesite i nisi o taimi i luga o lana talosaga po o, pe afai ua lē avanoa o ia.
- (4) O le a umia e le Sui Taitaifono le tofi mo se vaitaimi e tolu (3) tausaga, ma o le a tatau ona agavaa mo le toe tofiaina mo nisi vaitaimi faaopoopo e oo atu i le tolu (3) tausaga e pei ona faia i ai se faaiuga a le Fono.
- (5) E mafai foi ona avea le Sui Taitaifono ma Sui Faa-Ao o le Iunivesite.

16. Vaitaimi i le Tofi:

- (1) E tatau i Sui ua tofia i lalo o le Tulafono 12(1)(c), (d), (e) ma le (f) ma sui e suitulaga ua tofia i lalo

o le Tulafono 13, ona umia le tofi mo le a lava le umi o le taimi e tofia ai i latou e o latou Malo.

- (2) E tatau ona umia e le Failautusi Aoao o le Ofisa Tutotonu o le Fono a Malo o le Pasefika, po o se sui faatu o le Failautusi Aoao le tofi mo le a lava le umi o le taimi e manatu o ia ua talafeagai ai.
- (3) E tatau i Sui o Faiaoga ua tofia i lalo o le Tulafono 12(1)(h) ma le (i) ona umia tofi mo se vaitaimi e tolu (3) tausaga seia vagana ai ua muta ona avea ai i latou ma sui o faiaoga a o lumanai ai ona muta lo latou vaitaimi i le tofi. E mafai ona toe tofia sui o faiaoga mo isi vaitaimi faaopopo e oo atu i le tolu (3) tausaga.
- (4) E tatau i tagata aooga o le Iunivesite ua tofia i lalo o le Tulafono 12(1)(j) ona umia le tofi mo se vaitaimi e tasi (1) le tausaga seia vagana ai ua muta lo latou avea ai ma tagata aooga o le Iunivesite a o lumanai ai ona muta lo latou vaitaimi i le tofi.
- (5) E tatau i sui o le Fono ua tofia i lalo o le Tulafono 12(1)(k) ona umia le tofi mo sea vaitaimi, lea e lē silia ma le tolu (3) tausaga, e pei ona manatu le Fono ua talafeagai ai i tulaga faapena i le taimi na faia ai le tofiga, ae vagana ai e faapea, e leai se sui na tofia e mafai ona galue mo se vaitaimi faaauau e silia i le iva (9) tausaga.

17. Tuua o le Tofi:

- (1) E mafai e se sui o le Fono ona faamavae mai le avea ai o ia ma sui e ala i se faiga tusitusia e tuuina atu i le Faa-Ao o le Iunivesite.
- (2) E mafai e le Fono, e ala i sana faaiuga, ona faamalolo se sui o le Fono i le avea ai ma sui pe afai o lea sui ua faapea ona:
 - (a) ia faaalua manino lona gaumativa;
 - (b) faamaonia faaletulafono lana soligatulafono lea ua manatu le Fono ua lē tatau ai ona avea o ia ma sui e umia le tofi;
 - (c) toesea e aunoa ma se faanoi i fonotaga sosoo e lua a le Fono; po o
 - (d) ua ia lē mafai ona tausisia manaoga o le faailoaina atu o faamatalaga o lo o i le Tulafono 20.
- (3) E lē mafai e le Fono ona faamalolo se sui o le Fono seia vagana ai ua tuuina atu e le Fono i lea sui se avanoa talafeagai e faafofoga ai ia te ia.
- (4) O le Faa-Ao po o Sui Taitaifono o le Fono, pe afai o lo o galue o ia e avea ai ma sui o le Taitaifono o le Fono, e tatau ona ia faaoo atu i se sui o le Fono ua faamalolo i lalo o le faafuaiupu (3) se tusi ua faatulaga atu ai tuutuuga o le iugafono ua faamaloloina ai lea sui.

18. O avanoa faigaluega lautele:

- (1) I le noatia ma le fai fuafua i le palakalafa (3), afai ua avanoa le tofi o se sui o le Fono a o lumanai

ai ona muta le vaitaimi o le sui i le tofi, e tatau i le faalapotopotoga na tofia pe na filifilia lea sui ona faatumuina le avanoa i se taimi vave lava e mafai ai ona faatino.

- (2) Ae vagana ai ua aiaia e le Fono se vaitaimi puupuu, o le a tatau ona umia e le sui fou le tofi mo le umi lava lea e tasi o le vaitaimi e faapei ai faatoa tofia mo le uluai taimi o ia i lalo o le Tulafono 12(1).
- (3) Afai e tulai mai se avanoa i totonu o le ono (6) masina a o lumanai ai ona muta le vaitaimi i le tofi o le sui, e mafai e le Fono ona faia se faaiuga e faapea, e lē manaomia le toe faatumuina o lea avanoa i lalo o lenei Tulafono.

19. E lē aafia taualumaga a le Fono i avanoa o tofiga ma isi:

I le noatia ma le fai fuafua i manaoga o le aofai o sui e mafai ai ona usua le fono e pei ona taua i le Tulafono 22(3), e leai se gaoioiga po o se taualumaga a le Fono, o so o sana Komiti po o so o se tagata o galue e avea ma sui o le Fono o le a tatau ona lē aloaia i le tulaga o le tulai mai o se avanoa po o ni avanoa i le avea ai ma sui o le Fono i le taimi e faia ai lea gaoioiga, po o se taualumaga, po o pe afai na i ai se faaletonu i le tofiaina po o agavaa o so o se sui o le Fono, po o se faaletonu foi i le usua ai o so o se fonotaga a le Fono.

20. Faailoaina o aia:

- (1) E tatau i se sui auai o le Fono, Senate po o se komiti o le Fono po o le Senate, o ia lea e i ai sana aia i se mataupu ua iloiloaina po o le a iloiloaina e le Fono, Senate po o le komiti, po o le a lava le tulaga e i ai, i se taimi vave lava e mafai ai, i le maea ai ona silafia e le sui o mea moni, talafeagai, ona ia faailoa atu le uiga moni o le aia, i le Faa-Ao o le Iunivesite po o le taitaifono o le faalapotopotoga ua taua.
- (2) E tatau ona faamauina le faailoaina atu o aia i lalo o le faafuaiupu (1) i totonu o faamaumauga o mataupu o le fonotaga a le Fono, Senate po o le komiti o le Fono, ma e lē tatau i le sui seia vagana ai ua manatu le Fono, Senate po o se komiti i se isi faiga e ese ai:
 - (a) ia i ai i so o se felafolafoaiga a le Fono, Senate po o le komiti, e tusa ai o lea mataupu; po o
 - (b) ia auai i so o se faaiuga a le Fono, Senate po o le komiti e tusa ai o lea mataupu.
- (3) Mo faamoemoega o lenei Tulafono ma le Tulafono 11, (o le Suetusi) o se tagata e i ai se aia i se mataupu pe afai o lea mataupu e fesootai i lea tagata, po o pe afai e i ai se aia tau tupe a se sui o le aiga e valalata lana faia po o se tagata e i ai se sootaga tau pisinisi ma lea tagata (e aofia ai so o se sootaga tau galuega) e faasino i le

mataupu ua talanoaina, po o, o le a aafia tuusao ai i se isi faiga e ese ai ona o le taunuuga o se faaiuga e faia i lea mataupu.

21. Malosiaga, tiute ma galuega tauave a le Fono:

(1) I le noatia ma le fai fuafua i le Feagaiga Tusitusia ma nei Tulafono, e tatau i le Fono, e faaopoopo atu i ai ma isi malosiaga uma ua faaee atu i ai, ona i ai o malosiaga, tiute ma galuega tauave nei:

- (a) ia faia tofiga nei -
 - (i) o le Ao o le Iunivesite, Faa-Ao Lagolago, ma le Sui Taitaifono o le Fono;
 - (ii) i luga o le fautuaga a le Komiti Soofatasi a le Fono, ma le Senate, o le Pule o le Iunivesite, Sui Pule ma Sui Peresetene;
 - (iii) o le tagata asiasi o le Iunivesite;
 - (iv) o le suetusi e galue i fafo atu o le Iunivesite;
- (b) ia faatulaga le faagasologa o le Iunivesite e aofia ai le faamaoniga o ana fuafuaga alualu mamao faapea le mataituina o lona faatinoga ma galuega;
- (c) i le maea ai ona iloiloina o manatu faaalua o le Senate -
 - (i) ia vaavaaia, mataitu ma iloilo gaoioiga tau aoaoga a le Iunivesite;

- (ii) ia faavaeina ma faaee atu faailoga tikeri, tipiloma, tusi pasi faamaonia po o isi faailoga maualuluga faapitoa po o faailoga taualoa e faaee atu e le Iunivesite ma, pe afai e talafeagai ma mafuaaga, ia faalēaogāina so o se faailoga o lo o taua i luga;
- (iii) ia fuafua tuutuuga ma aiaiga e mafai ai e so o se isi lava inisetiute po o se faalapotopotoga ona galulue fesootai ma le Iunivesite;
- (iv) ia iloilo galuega a le Iunivesite, ma ia faia ni laasaga ua manatu e talafeagai ai ma le faalauiloaina o sini autu o le Iunivesite ma faamautuina lona lava lelei atoatoa, faapea ai ma le tulaga aupito sili ona lelei e manaomia;
- (d) e mafai i luga o le fautuaga a se Komiti Soofaatasi a le Senate ma le Fono, ona tuuina atu so o se faailoga tulaga ese tau tomai faapitoa, e aofia ai ma tikeri tuuina atu i tulaga taualoa;
- (e) ia faamaonia taualumaga mo le tofiaina o sui o le aufaigaluega tau aoaoga a le Iunivesite ma saunia se siosiomaga saogalemu ma lagolago malosi i le aufaigaluega uma o le Iunivesite;

- (f) ia vaavaai lelei le pulega ma le faafoega o tupe, faamatalaga tau tupe, teufaafaigaluegaina o tupe, meatotino, pisinisi ma mataupu uma po o le a lava a le Iunivesite e aofia ai ae lē faatapulaaina i mataupu uma e faasino i pili o tagata aoga ma faamanuiaga e agavaa i ai le afaigaluega;
- (g) ia faaleleia le galulue faatasi ma tagata aoga ua pasi atoatoa mai o le Iunivesite, aoaoga, pisinisi, tomai faapitoa, suesuega faapitoa ma isi faalapotopotoga talafeagai;
- (h) ia iloilo i se tulaga masani le faatinoga o galuega a le Fono lava ia ma le Faa-Ao Lagolago, Pule, Sui Taitaifono ma Taitaifono taitasi o Komiti o le Fono;
- (i) ia mautinoa ua saunia e le Iunivesite ni taiala alualu mamao talafeagai o le faafoega o tulaga lamatia ma auala e faatino ai ma le lipoti atu;
- (j) ia i ai le puipuigamalu ma le faaaogāina o le faamaufailoga ma ia faatonutonuina le faaaogāina o faailoga ma tagavai o le Iunivesite;
- (k) ia faatonuina ituaiga laei aloaia e talia ma laei e faaaogāina i totonu o aoga;
- (l) I le tulaga lautele e mafai ai ona faatino ia malosiaga, tiute ma galuega tauave uma, e pei ona po o ua mafai ona faaee

atu i le Fono i totonu o le Feagaiga Tusitusia ma nei Tulafono, e aofia ai le malosiaga e faia ai tulafono i le faatinoga o ia malosiaga, tiute ma galuega tauave e pei ona faamanino mai i nei Tulafono faapea ai ma isi malosiaga uma, tiute ma galuega tauave ua faaee atu i le Fono.

- (2) A o lumanai ai le faia o se faaiuga e uiga i so o se mataupu e le Fono e ono i ai sona aafiaga tuusao i matafai oi tau le aoaoga a le Senate, ma e le i iloilo ina muamua e le Senate, e tatau i le Fono ona talosagaina le Senate mo ni a latou fautuaga po o se lipoti i lea tulaga, ma e tatau ona amanaia so o sea fautuaga po o le lipoti.

22. Fonotaga a le Fono:

- (1) E tatau ona usua fonotaga a le Fono a itiiti mai e faa-tasi i le tausaga.
- (2) E mafai ona usua se fonotaga faapitoa i so o se taimi i luga o le talosaga tusitusia a le Faa-Ao Lagolago, po o, a itiiti mai o sui e toasefulu o le Fono.
- (3) O le aofai o sui e mafai ai ona usua se fonotaga a le Fono, e tatau ona maua le afa o le fuainumera o sui o i ai nei, o i latou ia ia lē itiiti ifo i le toavalu (8) sui (po o sui e suitulaga) e tofia e sui faaitulagi.
- (4) O fonotaga a le Fono e tatau ona faatautaia e tusa ai ma le Tulafono 33 (Tausalumaga).

23. Faasalalauina o Iugafono a le Fono:

- (1) I luga o le pule faitalia a le Faa-Ao Lagolago po o le Komiti Tau Pulega, e mafai e le Fono ona faia so o se mea lea e mafai ona faia e ala i se iugafono na pasia i sana fonotaga, e aunoa ma le toe faia o se fonotaga e ala i se iugafono e sainia e tusa ai ma le faafuaiupu (2).
- (2) Mo faamoemoega o lenei Tulafono, e tatau ona pasia e le Fono se iugafono pe afai:
 - (a) ua uma ona faaoo atu i sui taitasi uma o le Fono se ata o le iugafono e tusa ai ma le Tulafono 34 i o latou tuatusi na iloa mulimuli o lo o nonofo ai; ma
 - (b) i le tulaga e uiga i se iugafono masani, e sainia lea iugafono e pei ona faamaonia a itiiti mai o le afa o le aofaiga o sui auai o le Fono o lo o umia tofi i lea taimi; ma
 - (c) i le tulaga o se iugafono faapitoa, e sainia e pei ona faamaonia lea iugafono e, a itiiti mai o le tolu-kuata o le aofaiga o sui o le Fono ma i se isi faiga e ese ai, e tusa ai ma le Mataupu 26(1) o le Feagaiga Tusitusia.

24. Komiti Tau Pulega o le Fono:

- (1) E ao i le Fono ona faavaeina se Komiti Tau Pulega a le Fono, lea e tatau ona ia tauaveina tiute ia e pei ona mafai e le Fono mai lea taimi i lea taimi ona tuuina atu i le Komiti.

- (2) O le Komiti Tau Pulega e tatau ona aofia ai:
 - (a) le Faa-Ao Lagolago;
 - (b) le Pule o le Iunivesite;
 - (c) le Sui Taitaifono o le Fono;
 - (d) Taitaifono o isi lava Komiti e pei ona tatau ona filifilia e le Fono mai lea taimi i lea taimi;
 - (e) ia lē itiiti ifo i le toalima (5) sui o le Fono e tofia e le itulagi e avea ma sui, a itiiti mai o le toatasi (1) o i latou e ao ona avea o se sui mai Fiti;
 - (f) o nisi lava sui o le Fono, e lē sili atu i le toatolu (3), e pei ona mafai ona tofia e le Fono mo vaitaimi i le tofi e oo atu i le tolu (3) tausaga le umi.
- (3) I le tofia ai o sui o le Komiti Tau Pulega i lalo o le parakalafa (2)(e) ma le (f), e tatau ona amanaia e le Fono le taiala faavae ua faatulaga atu i le Tulafono 14 ma, e tatau foi ona taumafai ina ia aua nei faaluafesasi le faatulagaina o vaitaimi o tofiga o sui, ina ia mautinoa ai o lo o sologa lelei le faaauauina o le faagasologa ma sui auai fou.
- (4) E tatau i le Komiti Tau Pulega ona usuia a latou fonu a itiiti mai e faa-tasi i le tai tolu (3) masina, ma i nisi lava taimi e pei ona finagalo ai le Komiti o Pulega, po o le Faa-Ao Lagolago, e ala i feutagaiga ma le Pule o le Iunivesite.
- (5) Afai, ae tulai mai se faalavelave faafuasei, e manaomia le faia o faaiuga mo le puleaina o le Iunivesite i mataupu i fafo atu o le aotelega

o malosiaga tuuina atu e le Fono, e mafai e le Komiti Tau Pulega ona galue e avea ma sui o le Fono peitai e ao ona ia vave lipotia lea mataupu i sui o le Fono.

- (6) O le aofai o sui e mafai ai ona faia fonotaga uma a le Komiti Tau Pulega e tatau ona maua le afa o le fuainumera o le aofai o sui o i ai nei o le Komiti Tau Pulega, lea e tatau ona aofia ai i lea aofaiga ia lē itiiti ifo i lo le toatolu (3) sui faaitulagi o le Fono.

25. O isi Komiti o le Fono:

- (1) E mafai e le Fono mai lea taimi i lea taimi ona faavaeina nisi lava Komiti Tumau po o ni Komiti Faapitoa e pei ona manatu o ia ua talafeagai ai.
- (2) E mafai e le Fono ona tofia ni tagata o i latou ia e le o ni sui o le Fono e avea ma sui o Komiti (e ese mai i le Komiti Tau Pulega) ae vagana ai e faapea o sui o le Fono ia aofia ai, a itiiti mai o le afa o sui o so o se Komiti.
- (3) E tatau ona lipoti atu Komiti taitasi uma i fonotaga taitasi uma a le Fono ma, afai e manaomia e le Fono, ia faapea foi i le Komiti Tau Pulega o le Fono.
- (4) Ae vagana ai ua aiaia faapitoa i se isi faiga e ese ai i totonu o nei Tulafono, o le Faa-Ao Lagolago ma le Pule o le Iunivesite e tatau ona avea ma sui e ala i le tofi, o Komiti uma o le Fono. I le toesea ai o le Faa-Ao Lagolago po o le Pule o le

Iunivesite, o le a tatau ona avea le Sui Taitaifono po o le Sui Pule o le Iunivesite i lena faasologa ma sui auai i ia Komiti.

26. O le tuuina atu o malosiaga:

- (1) I le noatia ma le fai fuafua i le Feagaiga Tusitusia, e mafai e le Fono i luga o se iugafono mai lea taimi i lea taimi, a le o se tulaga lautele po o se tulaga faapitoa, ona tuuina atu malosiaga i le Pule, Komiti Tau Pulega po o i so o se isi lava Komiti o le Fono, so o se tasi o ona malosiaga po o galuega tauave i lalo o le Feagaiga Tusitusia (e ese ai na i lo malosiaga e tofia ai se Pule ma le faia o tulafono).
- (2) E mafai e so o se Komiti o le Fono lea ua tuuina atu i ai galuega tauave i lalo o le faafuaiupu (1), e ala i se faiga tusitusia e sainia e le Pule po o, a itiiti mai o ni sui e toalua (2) o le Komiti, ona tuuina atu nisi o ia galuega tauave e pei ona mafai ona faamaonia e le Fono i se sui o le aufaigaluega a le Iunivesite.
- (3) E mafai e le Pule o le Iunivesite mai lea taimi i lea taimi, a le o le tulaga lautele po o i se tulaga faapitoa, e ala i se faiga tusitusia, ona tuuina atu i so o se sui o le aufaigaluega a le Iunivesite:
 - (a) so o se tasi o galuega tauave a le Pule i lalo o le Feagaiga Tusitusia po o Tulafono; ma

- (b) nisi o galuega tauave na tuuina atu e le Fono i le Pule i lalo o lenei fuaiupu e pei ona mafai ona faamaonia e le Fono.
- (4) I le noatia ma le fai fuafua i so o se faatonuga lautele po o se faatonuga faapitoa ua tuuina atu, po o ni tuutuuga ua faaee atu e le Fono po o le Pule, po o le a lava le tulaga e mafai ai, e mafai e se Komiti o le Fono po o se sui o le aufaigaluega a le Iunivesite lea ua faasino i ai po o lē ua tuuina atu i ai so o se galuega tauave i lalo o lenei fuaiupu, ona faatino ia galuega tauave i lea lava faiga, ma faatasi ai ma lea lava faamamaluga e faapei ai na faaeeina atu ia galuega tauave i le Komiti po o se sui o le aufaigaluega i se faiga tuusao e lenei Tulafono, ae lē ona o malosiaga tuuina atu.
- (5) O le tuuina atu o malosiaga i lalo o lenei Tulafono o le a lē aafia ai pe taofia ai le faatinoga o so o se galuega tauave e le Fono po o le Pule, po o le a lava le tulaga e mafai ai, po o, e aafia ai le matafaioi a le Fono po o le Pule mo gaoioiga a so o se tagata i lalo o malosiaga tuuina atu.
- (6) E mafai ona faalēaogāina malosiaga tuuina atu i lalo o lenei Tulafono e ala i se faiga tusitusia ma le loto i ai ma, seia vagana ai ua faalēaogāina, e faaauau pea ona faamalositia e tusa ai ma lona faamoemoe.

VAEGA 4
O LE SENATE

27. O sui e aofia ai i le Senate

- (1) E tatau ona aofia ai i le Senate tagata nei, ua taua:
 - (a) sui e auai i fonotaga ona o le aloaia o tulaga tofi e pei o -
 - (i) le Pule (o ia lea e tatau ona avea ma Taitaifono o le Senate);
 - (ii) o le Sui Pule (po o Sui Pule) ma Sui Peresetene;
 - (iii) Faa-Ao o Pule o le Iunivesite;
 - (iv) o Matuaofaiva o Matata taitasi;
 - (v) o le Faatonu, Vaega Autu mo Aoaoga o Tomai Eseese;
 - (vi) o le Faatonu, o Auaunaga o Faamatalaga Faatekonolosi;
 - (vii) o le Tausi Potu Tusi a le Iunivesite;
 - (b) o sui filifilia -
 - (i) e toalua (2) faauluuluga o le aoga i matata taitasi e filifilia e le aufaigaluega tau tomai faapitoa o matata;
 - (ii) e toatolu (3) polofesa i matata taitasi e filifilia e le aufaigaluega tau tomai faapitoa o matata;

- (iii) e toalima (5) sui o le aufaigaluega tau tomai faapitoa e le o ni polofesa e filifilia e le aufaigaluega uma lava, a itiiti mai e tatau ona toatolu (3) tamaitai;
 - (iv) e toatolu (3) Faatonu o le Aoga i fafo atu o Fiti, a itiiti mai e tatau ona toatasi (1) se tamaitai e filifilia e Faatonu uma o le aoga;
 - (v) e toafa (4) sui o tagata aoga, a itiiti mai o le toalua (2) o ni tamaitai, e tofia pe filifilia e tusa ai ma Tulafono a le Iunivesite;
- (c) o se sui e tofia mai so o se faalapotopotoga tau tomai o lo o fesootai i ai, po o, o lo o galulue faatasi i se isi itu e ese ai ma le Iunivesite, i tuutuuga e pei ona mafai e le Fono mai lea taimi i lea taimi ona fuafuaina.
- (2) E tatau i sui o le Senate ua aloaia ona o tulaga tofi, ona umia tofi i le a lava le umi a o faaauau ai ona latou umia tofiga e tusa ma le filifilia ai o i latou.
 - (3) O sui o le Senate ua filifilia i lalo o le parakalafa (1)(b)(i) i le (iv) e tatau ona latou umia tofi mo se vaitaimi e tolu (3) tausaga, ma e mafai foi ona toe filifilia mo vaitaimi faaopoopo e tolu (3) tausaga.
 - (4) O sui aoga o le Senate o le a tatau ona latou umia tofi mo le tausaga e tasi (1).

74 *Teuteuga o le Tulafono o le Aoga* 2019, Nu. 26
Tau Faatoaga a le Iunivesite o le Pasefika i Saute

- (5) O se sui o le Senate ua tofia i lalo o le parakalafa (1)(c) o lenei Tulafono o le a tatau ona tumau pea i lea tofiga seia vagana ai ua fuafuaina e le Fono e faapea o le tofiga o so o sea sui ua tatau ona faamuta.

28. Matafaioi a le Senate:

O le Senate o le a tatau ona avea ma pulega tau aoaoga a le Iunivesite ma e tatau, i le noatia ma le fai fuafua i malosiaga, tiute ma galuega tauave ua faasee atu i le Fono e le Feagaiga Tusitusia ma nei Tulafono, ona ia saunia auala e faatino ai ma galue i sea faiga e foliga mai ia te ia ua fuafuaina lelei ina ia faalauiloa ai le tulaga maua tele i tomai i le aoao atu, suesuega faapitoa, o auunaga mo tagata lautele ma isi galuega tau tomai a le Iunivesite.

29. O malosiaga o le Senate:

E tatau i le Senate, i le noatia ma le fai fuafua i le Feagaiga Tusitusia ma nei Tulafono, e faaopoopo atu i isi malosiaga uma ua faaee atu i ai, ona i ai malosiaga, tiute ma galuega tauave nei:

- (a) e tuuina atu fautuaga i le Fono ma lipoti atu i mataupu e faatatau i le tulaga aupito sili ona lelei e manaomia o aoaoga ma le tulaga o le aoao atu, suesuega faapitoa ma sikolasipi ma ia faufautua atu i le Fono -
- (i) e uiga i le faamautuina po o le motusia o tikeri, tipiloma, tusi pasi ma isi faailoga taua ma taualoa;

Tau Faatoaga a le Iunivesite o le Pasefika i Saute

- (ii) i tuutuuga ma aiaiga e mafai ai e so o se faalapotopotoga po o se itutino ona fai paaga i le tuuina atu o polokalame tau aoaoga po o le faatulagaina o pasi i mataupu e mafai ona fesiitai;
- (iii) e uiga i le talafeagai o le tuuina atu o lagolago tau tomai mo le faagasologa auiluma ma le faauuina o tagata aooga; ma
- (iv) i so o se mataupu ua faasee atu i ai e le Pule po o le Fono;
- (b) ia faamaonia polokalame fou tau tomai ma suiga i polokalame tau tomai o lo o i ai nei, ma faia iloiloga o polokalame uma tau tomai o lo o i ai nei i se faagasologa masani;
- (c) ia faamaonia, teuteu ma faalēaogāina Tulafono Faatonutonu tau tomai ma faiga faavae, ma mataitu le tausisia o nei aiaiga;
- (d) ia fuafuaina Tulafono Faatonutonu ma faiga faavae e uiga i le taliaina, filifilia ma le resitalaina o tagata aooga;
- (e) ia fuafuaina manaoga e ao ona faamalieina e sui faatutu mo faailoga faapitoa e tuuina atu e le Iunivesite o se tikeri, tipiloma po o se tusi pasi;
- (f) ia fuafuaina tuutuuga ma aiaiga o faailoga faapitoa, o sikolasipi, faailoga eseese ma isi ituaiga faailoga o tulaga amanaia o lo o faafoe ai mataupu tau aoaoga;

- (g) ia fuafuaina po o a tulaga aloaia e tatau ona faapipii atu i le tauaaoina o tikeri, tipiloma, tusi pasi ma isi faailoga maualuluga ma faailoga taualoa ma faatonutonuina faaletulafono le faaaogāina o le laei tau aoaoga a le Iunivesite;
- (h) ia i ai le vaaiga aoao i le lagolago tau tomai, ia uunaia ma faaleleia le tulaga lelei aupito maualuga e manaomia o le ola aoaoina o tagata aooga i le poto masani, ma faatonutonu faaletulafono le amio pulea lelei o tagata aooga;
- (i) ia faamaonia, teuteu po o le faalēaogāina o Tulafono Faatonutonu tau suesuega faapitoa ma faiga faavae; ma ia mataituina le tausisia o nei aiaiga;
- (j) ia faatino i se tulaga lautele nisi lava malosiaga ua faatonuina i totonu o le Feagaiga Tusitusia o le Iunivesite, Tulafono, Tulafono na pasia a o lumanai le Tutoatasi ma Tulafono Faatonutonu, po o ua tuuina atu i ai e le Fono ma tofia sui o le Senate e avea ma sui o le Fono i lalo o le Tulafono 12(1)(h).

30. Fonotaga a le Senate ma Komiti o le Senate:

- (1) O le aofaiga o sui e mafai ai ona usua fonotaga uma a le Senate e tatau ona maua le afa o le fuainumera o ona sui, ma e tatau foi ona faatautaia fonotaga e tusa ai ma le Tulafono 33 (Tualumaga).

Tau Faatoaga a le Iunivesite o le Pasefika i Saute

- (2) E mafai e le Senate mai lea taimi i lea taimi ona faavaeina Komiti Tumau po o Komiti Faapitoa ia e mafai ona aofia ai tagata o i latou ia e le o ni sui o le Senate.
- (3) Ae vagana ai ua aiaia faapitoa i se isi faiga e ese ai i totonu o so o se Tulafono po o Tulafono na pasia a o lumanai le Tutoatasi, e tataui i le Pule o le Iunivesite ona avea ma sui e ala i lona tofi i Komiti uma a le Senate. I le toesea ai o le Pule, e mafai e se Sui Pule Lagolago ona auai e avea ma sui o le Pule i ia Komiti.
- (4) E mafai e le Senate ona tuuina atu so o se tasi o ona malosiaga, tiute ma galuega tauave, e aofia ai so o se malosiaga, tiute ma galuega tauave o lo o i ai na tuuina atu i ai e le Fono, po o se isi lava faalapotopotoga o tagata i so o se komiti ua faavaeina i lalo o le parakarafa (3) o lenei Tulafono, po o i so o se isi lava tagata; ma e mafai e le komiti, po o le tagata, e aunoa ma se faamaoniga a le Senate, ona faatino ia malosiaga po o le faatino o na tiute po o galuega tauave i le faiga lava lea ma taunuuga lava ia e pei ona sa mafai ona faatinoina pe na faia e le Senate lava ia, ae vagana ai ua aiaia e faapea, e mafai e le Fono ona faasaina, po o le faaeeina atu ni tuutuuga e tusa ai ma le tuuina atu e le Senate o so o se malosiaga, tiute po o galuega tauave ia ua tuuina atu i le Senate e le Fono.

- (5) O so o sea tulaga e tuuina atu ai malosiaga o le a tatau ona faalēaogāina i le lotou i ai ma e lē tatau i so o sea tuuina atu o malosiaga ona taofia ai le faatinoga o so o se malosiaga po o le faatinoga o so o se tiute po o galuega tauave e le Senate.
- (6) Ae vagana ai ma seia vagana ua faalēaogāina le tuuina atu o ia malosiaga, o le a tatau ona faaauau pea ona faamamaluina e tusa ai ma lona faamoemoe.

VAEGA 5

O AMIOGA PULEA MA ISI TULAGA A LE AUFALGALUEGA MA TAGATA AOOGA

31. **O amioga pulea a le aufalgaluega:**

E mafai e le Pule o le Iunivesite, le Sui Pule, Sui Peresetene, sui o le aufalgaluega, ma i latou o lo o umia so o se isi lava tofiga mo lenei faamoemoe na faia e le Fono mai lea taimi i lea taimi, ona fautuaina i tualumaga e faafoeina ai amioga pulea po o le aveeseina mai le tofi, e tusa ai ma Tulafono ua faia e le Fono.
32. **Taliaina ma le faafoega o amioga pulea a tagata aooa:**
 - (1) I le noatia ma le fai fuafua i nei Tulafono ma so o se Tulafono ma Tulafono Faatonutonu a le Iunivesite, e mafai e le Pule ona:

- (a) aveeseina po o le faataga le aveeseina o so o se tagata mai so o se vaega o le Iunivesite po o nofoaga ma fale o lo faaaogāina e le Iunivesite;
 - (b) teena le talia o so o se tagata e avea ma tagata aoga o le Iunivesite.
- (2) E tatau i le Pule o le Iunivesite ona ia lipoti atu so o se tulaga ua aveesea ai se tasi i le Senate i lana fonotaga e sosoo ai.

VAEGA 6 AIAIGA ESEESE

33. **Taualumaga:**

O aiaiga nei o le a tatau ona faaaogā i le Fono, o le Komiti Faafoe, le Senate ma so o se Komiti o le Fono po o le Senate, seia vagana ai ua faaalua manino i totonu o le Feagaiga Tususia po o nei Tulafono:

- (a) e faapea o so o se sui ua tofia pe na filifilia, o ia lea ua manaomia e nei Tulafono ina ia umia so o se agavaa, o le a faatatauina e faapea ua tuua lona tofi pe afai ua ia lē toe umia nei agavaa;
- (b) o so o se sui na tofia, filifilia po o se sui ua suitulaga ma le Taitaifono (e ese mai i le avea ma sui e ala i le tofi), e mafai ona faamavae mai lona tofiga;
- (c) o so o se sui na tofia, filifilia po o se sui ua suitulaga ma le Taitaifono (e ese mai i le avea ma sui ona o le tulaga tofi), e tatau ona agavaa mo le toe tofiaina po o le toe filifilia;

- (d) e tatau ona faia le faaiuga i mataupu uma taitasi e ala i le numera fulisia o le aofai o sui o lo o auai ma palota i le mataupu. I le tulaga tutusa o palota, e tatau i le tagata o lo o seei i le nofoa ona faia lana palota e faia ai le faaiuga, tusa lava pe na palota o ia i le lafo pe leai foi;
- (e) i le noatia ma le fai fuafua i nei Tulafono, e mafai e itutino ua taua i lenei Tulafono ona faia le faaiuga e uiga i le taimi ma le nofoaga e faia ai a latou fonotaga, ma le taualumaga e ao ona mulimulitaia i fonotaga, ma e mafai foi ona latou faia Tulafono Tumau mo le faamoemoe o le faatonutonuina faaletulafono o ana taualumaga.

34. O le faaooina atu o faasilasilaga ma pepa aloaia:

- (1) O so o se faasilasilaga po o se pepa aloaia o manaomia e, po o mo le faamoemoe o nei Tulafono ina ia tuuina atu pe auina atu i se sui o le Fono, Senate, le aufaigaluega, tagata aoga po o le au faauu o le Iunivesite, e mafai ona tuuina atu pe auina atu a le o le tuulima atu i le tagata po o le lafoina atu i le meli po o le auina atu faapitoa i le tuatusi o le tagata e pei ona faamauina ai i faamaumauga a le Iunivesite.
- (2) E faatoa mafai ona tuuina atu faasilasilaga e ala i le imeli po o isi lava faiga faaeletoroni, pe afai ua tuuina mai se faasilasilaga i le mauaina ai o lea tulaga e, po o le avea ai ma sui o le tagata ua faamoemoe e tuuina atu i ai.

- (3) Afai ua lafoina atu se faasilasilaga po o se pepa aloaia e ala i le meli, ua faatatauina lava e faapea ua faaooina atu lelei lea pepa aloaia e ala i le faatuatusi ma lafoina atu o se tusi o lo o i ai le faasilasilaga po o le pepa aloaia, ma ua tatau ona avefaapea, ua maea lelei ona faatino i le taimi tonu e tatau ai i le faagasologa masani o le faaooina atu o tusi.

35. Aiaiga tau soloaiga:

- (1) O tagata ofisa o le Iunivesite ua tofia a o le lumanai ai ona talia aloaia ma faamaonia o nei Tulafono, o le a tatau ona faaauau ai pea ona umia tofiga i luga o tuutuuga ma aiaiga e pei ona tofia ai i latou.
- (2) E tatau ona faaauau pea ona umia tofiga e sui o le Fono ma le Senate (e ese mai tagata ofisa) i le taimi e talia aloaia ma faamaonia ai nei Tulafono ma, e mafai ona toe filifilia ma tofia i ia tofiga pe afai e agavaa mo le toe filifilia po o le toe tofia i lalo o Tulafono fou.

Faamaonia e le Fono i lana Fonotaga C82 na usuia i le aso 17 & 18 Me 2016".

O le Tulafono o Teuteuga o le Tulafono o le Aoga Tau Faatoaga a le Iunivesite o le Pasefika i Saute 2019 o lo o faafoeina e le Matagaluega o Aoga, Taaloga ma Aganuu.

**Lolomiina e le Failautusi o le Fono Aoaofaitulafono,
i le pule a le Fono Aoaofaitulafono.**